

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI ISNIN : 7 DISEMBER 2020

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 12 HINGGA NO. 51)

[SOALAN NO 6 DIJAWAB BERSEKALI DENGAN SOALAN NO 50 DAN 51]

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 7 DISEMBER 2020 (ISNIN)

SOALAN

Minta **MENTERI SAINS, TEKNOLOGI DAN INOVASI** menyatakan status terkini penyediaan vaksin COVID-19 bagi Malaysia, dan bilakah ia dijangka akan mula diberi kepada rakyat.

JAWAPAN

Tuan Yang di-Pertua,

Izinkan saya menjawab soalan ini bersekali soalan yang telah menyentuh isu sama iaitu nombor 50 dan 51 hari ini, soalan daripada Yang Berhormat Ledang, Yang Berhormat Marang, Yang Berhormat Kota Raja, Yang Berhormat Kuala Kedah bertarikh 10 Disember serta soalan daripada Yang Berhormat Hang Tuah Jaya dan Yang Berhormat Hulu Selangor bertarikh 15 Disember.

Untuk makluman Ahli-Ahli Yang Berhormat,

Sebagaimana yang telah dimaklumkan sebelum ini, Malaysia meletakkan sasaran 70% daripada keseluruhan populasi negara bagi pembentukan imuniti kelompok (herd immunity) di bawah Pelan Imunisasi Kebangsaan bagi penyakit COVID-19.

NO. SOALAN : 6

Sehingga kini, Malaysia telah menandatangani dua perjanjian yang memberi jaminan bekalan vaksin sebanyak 30% daripada jumlah populasi negara. Perjanjian pertama adalah bersama COVAX Facility melalui Optional Purchase Arrangement yang ditanda tangani pada 23 November 2020 yang lalu yang menjamin bekalan vaksin sebanyak 10% populasi negara. Manakala perjanjian kedua pula adalah perjanjian pembelian awal dengan syarikat farmaseutikal Pfizer yang dimeterai pada 24 November 2020 bagi mendapatkan bekalan vaksin sebanyak 20% daripada populasi negara (12.8 juta dos).

Bagi mencapai baki sasaran sebanyak 40% lagi, Kerajaan masih di dalam proses perbincangan dan rundingan bersama syarikat-syarikat farmaseutikal pembangun vaksin COVID-19 yang lain.

Bagi tujuan imunisasi kepada rakyat pula, Kerajaan mensasarkan tempoh suku tahun pertama 2021 bagi memperoleh wajaran pertama bekalan vaksin COVID-19.

Suka ditegaskan, Kerajaan tidak akan berkompromi dalam soal keselamatan dan keberkesanan sesuatu vaksin. Keputusan akhir bagi penggunaan sesuatu vaksin di Malaysia hanya akan dibuat selepas melalui proses pendaftaran dan kelulusan daripada Bahagian Regulatori Farmasi Negara (NPRA) di bawah Kementerian Kesihatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' SERI DR. WAN AZIZAH WAN ISMAIL [PANDAN]

TARIKH : 7 DISEMBER 2020 (ISNIN)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KOMUNIKASI DAN MULTIMEDIA** menyatakan:-

- a) status penyelidikan berkenaan keperluan undang-undang khusus anti buli siber yang telah dijalankan oleh pihak Kementerian; dan
- b) usaha-usaha bagi memastikan kes buli siber terhadap kanak-kanak dan belia ditangani secara berkesan.

JAWAPAN

Tuan Yang Dipertua,

Untuk makluman Ahli Yang Berhormat, status kajian berkenaan keperluan pewujudan Akta Anti Buli Siber oleh Kementerian ini bersama Universiti Multimedia Malaysia (MMU) masih sedang berlangsung dengan mengikut garis masa yang telah ditetapkan.

Beberapa sesi libat urus telah dilaksanakan dengan Bahagian Hal Ehwal Undang-Undang (BHEUU), Jabatan Perdana Menteri (JPM), *Malaysian Cyber Consumers Association* (MCCA), United Nations Children's Fund (UNICEF) Malaysia dan pihak-pihak berkepentingan dalam usaha mendapatkan input mengenai keperluan pewujudan Akta Anti Buli Siber.

Pelaksanaan soal selidik berkaitan kajian keperluan akta telah mula diedarkan kepada Kementerian/Jabatan/Agensi dan Badan Peguam Negara mulai 20 November 2020. Tempoh pelaksanaan soal selidik adalah sehingga 4 Disember 2020.

Selain itu, Kerajaan turut menggerakkan program kesedaran dan pendidikan bagi memupuk budaya penggunaan secara bijaksana dan berhemah dalam kalangan pengguna media sosial termasuk golongan kanak-kanak dan belia. Program CyberSAFE (*Cyber Security Awareness For Everyone*), Modul Kesedaran Keselamatan Siber Nasional (MKKSN), Inisiatif Etika Siber Kebangsaan, Keibubapaan siber (*Cyber Parenting*) dan program advokasi seperti Klik dengan Bijak (KDB), Hentikan Buli Siber dan Berita Palsu giat dilaksanakan bagi mewujudkan masyarakat Malaysia yang bertanggungjawab.

Mesej-mesej mengenai tips penggunaan Internet dalam bentuk yang lebih menarik khususnya untuk kanak-kanak dan belia juga telah dilaksanakan dalam bentuk infografik, video grafik serta klip video melalui platform media sosial seperti *Instagram*, *Facebook*, *Youtube* dan *LinkedIn* pengguna.

Selain daripada itu, antara usaha-usaha Kementerian untuk menyampaikan kesedaran kepada rakyat adalah melalui rancangan bual bicara, laporan berita, Pesanan Khidmat Masyarakat (PSA), infografik media sosial dan media dalam talian serta hebahan program-program radio. Dalam tempoh Januari hingga Oktober 2020, RTM menerusi 4 saluran TV, 34 stesen radio dan 192 akaun media sosialnya telah menyiarkan sejumlah 6,788 hebahan di semua platformnya mengenai bahaya penipuan siber dan salah guna data peribadi. Dalam memastikan mesej berkenaan sampai kepada rakyat, hebahan berkenaan terutamanya menerusi PSA dan infografik masih disiarkan pada setiap masa sehingga kini. RTM juga berusaha memastikan mesej disampaikan dengan cara mesra penonton dan menghiburkan.

**PEMBERITAHUAN PERTANYAAN DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 7 DISEMBER 2020 (ISNIN)

SOALAN

minta **MENTERI PEMBANGUNAN LUAR BANDAR** menyatakan adakah Kementerian berhasrat untuk menyalurkan peruntukan secara terus dan kepada Kerajaan Negeri Sabah dan memberi kepercayaan untuk mengurus tadbir agihan peruntukan tersebut berdasarkan keperluan yang telah dikenal pasti di peringkat negeri memandangkan Kerajaan Sabah kini adalah sehaluan dengan Kerajaan Persekutuan.

JAWAPAN

Tuan Yang di-Pertua,

Kerajaan sentiasa berusaha untuk memastikan kesejahteraan masyarakat luar bandar di Negeri Sabah terus dipertingkatkan meliputi keperluan asas prasarana, pembangunan ekonomi, keusahawanan dan pembangunan modal insan di semua peringkat lapisan masyarakat.

Mengenai hasrat Yang Berhormat berkenaan cadangan menyalurkan perutukan secara terus kepada Negeri Sabah, KPLB bersedia untuk mempertimbang dan memperhalusi perkara ini dalam projek-projek tertentu. Sebahagian projek-projek ini kita letakkan di bawah kawal selia agensi di bawah KPLB.

Sebagaimana Yang Berhormat sedia maklum, Kementerian memang telah pun sedia menjalin kerjasama baik dengan agensi-agensi di bawah Kerajaan Negeri Sabah seperti Jabatan Kerja Raya (JKR) Sabah, Sabah Electricity Sdn. Bhd (SESB), Jabatan Air Negeri Sabah (JANS), Lembaga Kemajuan Tanah Sabah (SLDB) dan Lembaga Industri Getah Sabah (LIGS) di mana agensi-agensi negeri ini telah disalurkan peruntukan secara terus saban tahun oleh pihak Kementerian bagi membantu melaksanakan pelbagai program/projek di Negeri Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan sama ada Kementerian Pendidikan Malaysia bersedia membuat kajian menyeluruh dan melaksanakan usaha untuk memperbaiki atau mengganti bangunan dan fasiliti sekolah-sekolah yang dikategorikan daif di Sabah. Adakah Kementerian berhasrat untuk membina sebuah sekolah baru yang lengkap dan mempunyai asrama untuk menggantikan Sekolah Menengah Kebangsaan Kalabakan yang usang dan daif.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik, untuk semua sekolah di seluruh negara. Ini adalah penting untuk memastikan prasarana yang kondusif serta pengajaran dan pembelajaran dilaksanakan dalam keadaan selamat di sekolah.

KPM juga sentiasa memantau keadaan fasiliti bangunan dan kemudahan sekolah, melalui Jabatan Pendidikan Negeri (JPN) dan Pejabat Pendidikan Daerah (PPD). Seterusnya, KPM mempunyai maklumat dan data perincian yang telah diverifikasi berdasarkan

komponen fizikal atau fasiliti bangunan di sekolah yang tidak sempurna, tidak berfungsi atau tidak selamat.

Untuk makluman Ahli Yang Berhormat, pada tahun 2019, KPM telah mula melaksanakan analisis skor gred impak dengan 7 tahap skala. Usaha ini adalah sebagai penambahbaikan bagi menentukan tahap keadaan komponen fizikal atau fasiliti bangunan di sekolah. Skala 1 hingga skala 4 merujuk kepada keadaan bangunan yang masih berfungsi dan selamat digunakan. Manakala, skala 5 adalah bangunan yang dilaporkan oleh pihak sekolah sebagai tidak selamat. Skala 6 pula merujuk kepada bangunan yang tidak selamat dengan pengesahan daripada pihak teknikal PPD atau JPN. Sementara skala 7 merujuk kepada bangunan yang tidak selamat dengan pengesahan daripada Jabatan Kerja Raya (JKR). Melalui penilaian ini, KPM dapat menentukan keutamaan untuk melaksanakan projek pembangunan semula atau menaik taraf bangunan sekolah yang tidak selamat digunakan. Tumpuan utama KPM adalah kepada bangunan yang berada pada skala 7 dan skala 6. Bangunan daif di sekolah terlibat akan dibaik pulih, dinaik taraf atau dibina bangunan gantian mengikut keperluan.

Mengenai SMK Kalabakan, KPM melalui JPN Sabah telah mengenal pasti bahawa terdapat keperluan untuk melaksanakan pembinaan bangunan gantian berserta kemudahan asrama dan rumah guru. Namun demikian, tapak tanah sekolah sedia ada masih belum menjadi hak milik Pesuruhjaya Tanah Persekutuan (PTP). Sehubungan itu, KPM sedang berusaha untuk membuat perolehan tanah bagi tujuan pindah milik kepada PTP terlebih dahulu. Seterusnya, KPM akan mengemukakan permohonan kepada agensi pusat untuk pembinaan bangunan gantian SMK Kalabakan. Buat masa ini, JPN Sabah dan PPD Tawau telah melaksanakan kerja baik pulih bangunan bilik darjah sedia ada dan pagar sekolah dengan menggunakan Peruntukan Pakej Rangsangan Ekonomi (PRE) Prihatin tahun 2020.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 7 DISEMBER 2020 (ISNIN)

SOALAN

DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI KOMUNIKASI DAN MULTIMEDIA** menyatakan apakah langkah Kementerian dalam membantu usahawan digital Malaysia contohnya seperti MyCar dan Moovby untuk selamat daripada hanya didominasi syarikat gergasi dalam dunia perniagaan seperti Grab.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian turut memainkan peranan dengan menyediakan program dan ekosistem yang kondusif untuk syarikat digital tempatan dan syarikat pemula niaga (*startup*) dalam sektor teknologi untuk kekal berdaya saing dalam pasaran tempatan dan global yang kian kompetitif ini.

Melalui program Pemecutan Pertumbuhan Global atau *Global Growth Acceleration*, Malaysia *Digital Economy Corporation* (MDEC) menyediakan bantuan dan khidmat nasihat kepada syarikat teknologi tempatan dalam aspek penjenamaan dan pemasaran, akses kepada pasaran, khidmat mentor dan pakar serta akses kepada peluang pembiayaan bagi meningkatkan kebolehan syarikat pemula niaga untuk berkembang dan bersaing dengan syarikat yang lebih besar di dalam sektor yang sama.

Melalui kerjasama dengan agensi kerajaan lain seperti Malaysia *External Trade Development Corporation* (MATRADE) serta rakan industri dan teknologi, MDEC juga membantu syarikat teknologi dan pemula niaga dalam meningkatkan lagi peluang untuk mendapatkan pembiayaan dan meluaskan pasaran mereka di dalam dan luar negara. MDEC juga turut menggalakkan syarikat tempatan untuk saling bekerjasama melalui kaedah perkongsian untuk mendominasi pasaran dalam negeri dan menembusi pasaran luar. Dalam memastikan syarikat tempatan untuk terus meraih peluang dalam situasi pandemik Covid-19 ini, MDEC turut melaksanakan program secara maya yang menyediakan platform untuk berkongsi *trend*, pasaran dan teknologi terkini serta platform untuk mendapat akses kepada tawaran pelaburan oleh rangkaian pendanaan global.

Antara pencapaian terkini program ini adalah seperti berikut :

- a. Enam (6) program pepadanan secara maya antara syarikat dan pelabur untuk peluang pendanaan. Lebih daripada 100 syarikat pemula niaga dan teknologi telah menyertai perjumpaan dalam talian dan dihubungkan terus dengan pelabur. Melalui usaha ini, 15 syarikat telah berjaya menerima dana pelaburan dengan nilai keseluruhan sebanyak RM138.2 juta;
- b. Lapan (8) program akses pasaran beserta pepadanan perniagaan secara maya dengan 160 perjumpaan dalam talian yang menghasilkan jumlah RM114.7 juta nilai peluang perniagaan; dan
- c. Enam (6) sesi webinar yang memfokuskan bimbingan dan perundingan dalam topik penerapan dan transformasi digital (*Digital Adoption and Transformation*) dalam mengharungi norma baharu.

Di samping itu, bagi menggalakkan pembangunan ekosistem syarikat teknologi dan pemula niaga tempatan dan global, MDEC juga telah melaksanakan inisiatif Malaysia *Digital Hub* (MDH). Inisiatif ini memberikan pengiktirafan kepada lokasi tertentu yang diuruskan oleh pihak swasta yang menawarkan perkhidmatan dan sokongan seperti

peluang pembiayaan kewangan, program *mentorship* dan *coaching* kepada syarikat pemula niaga. Sehingga kini, terdapat sebanyak 20 lokasi berstatus MDH yang menempatkan sebanyak 594 syarikat.

Berdasarkan contoh syarikat yang dinyatakan, iaitu syarikat Moovby, syarikat ini juga telah mendapat manfaat melalui program yang dilaksanakan oleh MDEC seperti berikut:

- a. Menyertai program EXPAND dan berjaya menjalin kerjasama dengan Traveloka;
- b. GAIN MasterClass: Storeytelling & Media Training pada September 2020;
- c. The Art of Pitching: An Investor Perspective pada Jun 2020 yang dilaksanakan oleh Velocity Venture; dan
- d. SuperSeed II Championship pada bulan Julai 2020 yang dianjurkan oleh Gobi Partners dan MDEC.

Manakala, syarikat MyCar juga turut telah mendapat manfaat melalui program kolaborasi '*Co-Creation*' yang dianjurkan MDEC. Program ini yang bertujuan membantu mengupayakan 1,250 usahawan mikro dan Perusahaan Kecil dan Sederhana (PKS) untuk mengguna pakai platform MyCar bagi tujuan perniagaan - sebagai contoh untuk perkhidmatan penghantaran pesanan dan jualan yang dilaksanakan sewaktu tempoh PKP bermula dari April hingga Ogos 2020. Selain itu, program kolaborasi ini juga melatih dan mengupayakan 500 pemandu motosikal atau kereta ke dalam platform MyCar sebagai pekerja gig untuk mendapat peluang pendapatan tambahan yang masih dalam pelaksanaan sehingga bulan November 2020.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' MAHFUZ BIN HAJI OMAR
[POKOK SENA]**

TARIKH : 7 DISEMBER 2020 (ISNIN)

SOALAN

DATO' MAHFUZ BIN HAJI OMAR [POKOK SENA] minta **MENTERI KEWANGAN** menyatakan:-

- (a) berapa jumlah lesen perjudian serta arak dalam negara mengikut tahun dari tahun 2008 hingga Oktober 2020; dan
- (b) berapa jumlah orang Islam yang menjadi lembaga pengarah syarikat judi dan arak.

JAWAPAN

Tuan Yang di-Pertua,

1. Untuk makluman Ahli Dewan, butiran operator perjudian yang dilesenkan oleh Kementerian Kewangan adalah seperti berikut:-

NO.	OPERATOR	BILANGAN
1.	Kasino	1
2.	Agensi Nombor Ramalan (NFO) termasuk ejen	1,663
3.	Kelab	161

2. Manakala, lesen pengilang arak yang dikeluarkan di bawah Jabatan Kastam Diraja Malaysia adalah seperti berikut:-

TAHUN	BILANGAN LESEN ARAK
2008 - 2014	88
2015 - 2017	86
2018	84
2019	83
2020	82

Tuan Yang di-Pertua,

3. Merujuk kepada soalan Yang Berhormat Pokok Sena berkenaan jumlah orang Islam yang menjadi lembaga pengarah syarikat judi dan arak, dimaklumkan bahawa maklumat tersebut boleh diperolehi daripada Suruhanjaya Syarikat Malaysia (SSM) memandangkan syarikat-syarikat tersebut bukan syarikat milik Kerajaan. Pelantikan lembaga pengarah syarikat judi dan arak pula adalah dibawah tadbir urus syarikat sepenuhnya.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 7 DISEMBER 2020 (ISNIN)

SOALAN

Minta **MENTERI TENAGA DAN SUMBER ASLI** menyatakan :-

faedah-faedah penggantian meter biasa kepada meter pintar (*Smart Meter*) kepada rakyat dan apakah langkah ini dapat membendung kegiatan negatif seperti kes usikan meter dan sebagainya.

JAWAPAN

Tuan Yang di-Pertua,

Untuk makluman Ahli Yang Berhormat,

1. Penggunaan meter pintar (*smart meter*, dengan izin), bertujuan untuk memastikan pihak Tenaga Nasional Berhad memberikan perkhidmatan yang cekap kepada pengguna dan rakyat dalam usaha untuk meningkatkan sistem penyampaian Kerajaan kepada rakyat.
2. Antara faedah penggunaan meter pintar adalah:
 - (i) membantu pengguna mengawal penggunaan elektrik mereka melalui pemantauan jumlah bil elektrik semasa secara harian, mingguan dan bulanan. Oleh itu pengguna dapat mengawal perbelanjaan bil elektrik mereka;

NO. SOALAN : 17

- (ii) membolehkan proses pemulihan dilaksanakan dengan lebih cepat kerana meter pintar akan menghantar notifikasi secara automatik kepada pihak TNB sekiranya terdapat gangguan bekalan elektrik di premis pengguna; dan
- (iii) pengguna mendapat bacaan bil elektrik tanpa memerlukan kehadiran pembaca meter di premis pengguna. Dalam hal ini pengguna sentiasa mendapat bacaan bil elektrik sebenar. Tiada lagi isu bil anggaran sekiranya pembaca meter tidak dapat merekodkan bacaan meter di premis pengguna.

3. Pembangunan dan pelaksanaan meter pintar juga akan dapat membendung kegiatan negatif seperti kes usikan pemasangan meter dan sebagainya memandangkan segala gangguan atau usikan ke atas meter pintar dapat dikesan secara automatik melalui fungsi meter pintar yang telah dilengkapi dengan ciri-ciri keselamatan dan pengesanan yang berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN WONG LING BIU [SARIKEI]

TARIKH : 7 DISEMBER 2020 (ISNIN)

SOALAN

TUAN WONG LING BIU [SARIKEI] minta **MENTERI KOMUNIKASI DAN MULTIMEDIA** menyatakan adakah SACOFA Sdn Bhd merupakan satu-satunya syarikat di Sarawak yang dibenarkan menyediakan infrastruktur telekomunikasi kepada penyedia perkhidmatan telefon bimbit. Adakah lesen syarikat ini diluluskan oleh Kementerian Komunikasi dan Multimedia dan apakah kelayakan yang dibenarkan bagi menjadi penyedia perkhidmatan infrastruktur telekomunikasi.

JAWAPAN

Tuan Yang Dipertua,

Untuk makluman Ahli Yang Berhormat, Sacofa Sdn Bhd merupakan salah satu pemegang lesen Individu Pemberi Kemudahan Rangkaian [NFP (I)] di bawah Akta Komunikasi dan Multimedia 1998 semenjak 11 Julai 2002. Setakat ini, terdapat 15 syarikat telekomunikasi yang berpusat di Sarawak yang memiliki lesen NFP (I) yang membolehkan syarikat-syarikat tersebut menyediakan infrastruktur telekomunikasi kepada pengendali rangkaian mudah alih.

Mana-mana syarikat yang berhasrat untuk memohon lesen Individu di bawah Akta Komunikasi dan Multimedia 1998 haruslah diperbadankan di Malaysia dan memiliki modal berbayar sekurang-kurangnya RM500,000.00. Pelan perniagaan yang dimajukan kepada Suruhanjaya Komunikasi dan Multimedia Malaysia (SKMM) akan dinilai secara terperinci dengan mengambilkira faktor-faktor seperti, latar belakang dan pengalaman barisan pengurusan syarikat, kepakaran teknikal yang dimiliki, kedudukan kewangan syarikat dan kemampuan untuk membiayai pelan perniagaan yang dicadangkan. Seterusnya, syor akan dikemukakan kepada Menteri Komunikasi dan Multimedia Malaysia (KKMM) untuk pertimbangan dan kelulusan.

Untuk makluman Ahli Yang Berhormat juga, lesen-lesen di bawah Akta 588 digubal agar bersifat neutral dari aspek teknologi dan perkhidmatan. Terma pelesenan Akta 588 juga membenarkan pemegang lesen menjalankan dan menguruskan aktiviti berkaitan pemasaran yang sekaligus mewujudkan peluang bagi meningkatkan lagi kesedaran dan memacu perkembangan industri.

Dalam hal ini, peluang adalah terbuka kepada mana-mana syarikat dari Sarawak untuk memohon lesen NFP(I) serta turut bersama-sama dalam pembangunan infrastruktur komunikasi dan seterusnya mewujudkan persaingan yang sihat dalam penyediaan infrastruktur komunikasi di Sarawak.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI MAHDZIR KHALID
[PADANG TERAP]**

TARIKH : 7 DISEMBER 2020 (ISNIN)

SOALAN

DATO' SERI MAHDZIR KHALID [PADANG TERAP] minta **MENTERI KEWANGAN** menyatakan berapa bilangan permohonan lanjutan moratorium yang telah diterima oleh institusi kewangan dan perbankan serta berapa jumlah permohonan yang telah diluluskan bagi membantu mengurangkan impak negatif pasca COVID-19 yang dihadapi oleh rakyat.

JAWAPAN

Tuan Yang Di-Pertua,

1. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:-

- a. sejumlah 40% telah memohon pelanjutan moratorium merangkumi individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik COVID-19; dan
- b. sejumlah 60% telah memilih pengurangan bayaran ansuran bulanan merangkumi peminjam yang pendapatannya telah berkurang.

2. Manakala kes permohonan yang tidak diluluskan adalah kecil iaitu sebanyak 2% dan sebab utama permohonan ditolak oleh bank ialah:-

- a. Peminjam individu masih mempunyai pekerjaan dengan pendapatan yang stabil, serta isi rumah termasuk pasangan masing-masing yang tidak mengalami pengurangan pendapatan; dan
- b. Peminjam PKS yang memang menghadapi kesukaran kewangan walaupun sebelum penularan wabak COVID-19. Bagi peminjam seperti ini, pelanjutan moratorium bukan satu penyelesaian yang mampan dan bank telah merujuk mereka kepada AKPK untuk mendapatkan bantuan bagi menyelesaikan masalah hutang mereka. AKPK telah menubuhkan “Meja Bantuan Perusahaan Mikro” bagi menawarkan khidmat nasihat kewangan secara percuma dan membantu perusahaan mikro mendapatkan bantuan bayaran balik pinjaman. Terdapat juga sebilangan kes PKS yang sedang melalui prosiding muflis atau pembubaran, atau telah didaftarkan di bawah Program Pengurusan Hutang anjuran AKPK. Bagi peminjam yang

berdaftar di bawah Program Pengurusan Hutang oleh AKPK, mereka boleh berhubung dengan AKPK untuk memohon semakan semula bayaran balik pinjaman yang mencerminkan keadaan kewangan semasa mereka.

Tuan Yang Di-Pertua,

3. Proses permohonan telah dipermudah dan diringkaskan bagi memastikan bantuan dapat diberikan dengan segera kepada mereka yang memerlukannya. Dalam kebanyakan keadaan, bank hanya menghendaki peminjam untuk mengemukakan penyata bank terkini atau mengisytiharkan bahawa pendapatan mereka telah terjejas akibat pelaksanaan sekatan pergerakan. Bagi penerima Bantuan Prihatin Nasional kumpulan M40 yang memohon pengurangan ansuran mereka, bank juga telah bersetuju untuk menerima pengisytiharan sendiri pengurangan pendapatan yang dialami akibat pandemik COVID-19.

4. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman akan disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DR. MASZLEE BIN MALIK [SIMPANG RENGAM]
TARIKH : 7 DISEMBER 2020 (ISNIN)

SOALAN

Minta **MENTERI PENGAJIAN TINGGI** menyatakan pendirian dan perancangan pihak Kementerian sama ada ingin membenarkan Institut Pengajian Tinggi Awam/Institut Pengajian Tinggi Swasta mengambil pelajar asing untuk mendaftar dan belajar secara online tanpa perlu mereka berada di tanah air seperti yang dilakukan di negara-negara maju.

JAWAPAN

Tuan Yang di-Pertua,

Kementerian Pengajian Tinggi (KPT) mendukung hasrat kerajaan untuk melaksanakan pendidikan terbuka ke arah pendemokrasian pendidikan tertuari. Justeru, selain pendidikan yang dikendalikan secara konvensional atau proses pengajaran dan pembelajaran (PdP) secara bersemuka, terdapat juga kaedah PdP yang dijalankan secara terbuka contohnya melalui medium elektronik atau dalam talian (*online*).

Program pengajian secara Pembelajaran Terbuka dan Jarak Jauh atau dengan izin, *Open and Distance Learning* (ODL) ini telah diperuntukkan di bawah Akta Institusi Pendidikan Tinggi Swasta 1996 (Akta 555) dan peraturan-peraturan di bawahnya. Kementerian sememangnya membenarkan IPTA/IPTS mendaftarkan pelajar asing dan meneruskan PDP secara dalam talian tanpa perlu mereka berada di tanah air.

KPT juga telah menyarankan pihak IPTA dan IPTS bersedia sepenuhnya dalam menyediakan platform pendidikan digital yang fleksibel, bermaklumat dan boleh diakses dengan baik oleh para pelajar walau di mana pun mereka berada.

Pada masa hadapan, adalah dijangkakan lebih banyak institusi yang akan mengendalikan pembelajaran secara ODL dan pihak KPT sentiasa menyokong usaha-usaha semua pihak dalam mewujudkan sistem pendidikan yang fleksibel serta memberi peluang kepada semua lapisan masyarakat menerapkan budaya pembelajaran sepanjang hayat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan adakah Kementerian bercadang untuk memberi potongan atau pengecualian yuran sekolah untuk tahun 2021 kepada golongan B40 terutamanya sebagai salah satu usaha Kementerian membantu meringankan tanggungjawab ibu bapa yang terjejas pendapatan sejak negara dilanda pandemik COVID-19.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah memansuhkan semua yuran sekolah yang dikenakan kepada ibu bapa atau penjaga murid di Sekolah Kerajaan (SK) dan Sekolah Bantuan Kerajaan (SBK) secara berperingkat mulai tahun 2008.

Bagi tahun 2020, KPM menyediakan peruntukan berjumlah RM1.024 bilion bagi membiayai pelaksanaan aktiviti di sekolah melalui pelbagai bantuan untuk tujuan pengajaran dan pembelajaran. Antaranya, Yuran Khas Sekolah (YKS) untuk aktiviti sukan/permainan, Pendidikan Jasmani, Kerja tangan dan Pendidikan Seni. Sebelum ini YKS dikenakan ke atas ibu bapa kepada murid yang bersekolah di SK dan SBK tetapi telah dimansuhkan mulai tahun 2008.

Pada tahun 2012 pula KPM telah memansuhkan Bayaran Tambahan Persekolahan yang sebelum ini dikenakan kepada setiap ibu bapa atau penjaga kepada murid pada awal tahun persekolahan. Kerajaan menanggung kos bayaran tambahan tersebut untuk murid warganegara melalui pemberian Bantuan Bayaran Tambahan Persekolahan (BBTP) bagi menampung kegiatan kokurikulum, kertas ujian dalaman serta kegiatan Pendidikan Islam/ Moral.

Di samping itu, Kerajaan juga menyediakan pelbagai jenis bantuan khusus berjumlah RM2.454 bilion yang dapat memberi manfaat kepada semua murid yang berkecukupan sepanjang sesi persekolahan. Antara bantuan tersebut adalah Bantuan Awal Persekolahan, Bantuan Makanan Asrama dan Rancangan Makanan Tambahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATUK SERI SAIFUDDIN NASUTION
BIN ISMAIL [KULIM-BANDAR BHARU]**

TARIKH : 7 DISEMBER 2020 (ISNIN)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan "reserve" Kerajaan sekarang dan berikan perincian.

JAWAPAN

Tuan Yang di-Pertua,

1. Pada 13 November 2020, rizab antarabangsa Malaysia berjumlah RM436.0 bilion atau USD104.9 bilion yang memadai untuk membiayai 8.6 bulan import tertanggung dan merupakan 1.2 kali jumlah hutang luar negeri jangka pendek. Rizab antarabangsa telah menunjukkan peningkatan sebanyak USD1.3 bilion berbanding akhir tahun 2019 iaitu sebanyak USD103.6 bilion.

2. Rizab antarabangsa berkenaan terdiri daripada rizab mata wang asing berjumlah USD95.2 bilion, kedudukan rizab IMF (USD1.4 bilion), Hak-hak Pengeluaran Khas (SDR) (USD1.2 bilion), emas berjumlah USD2.4 bilion dan lain-lain aset rizab (USD4.7 bilion).

Sekian, terima kasih.

PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 7 DISEMBER 2020 (ISNIN)

SOALAN

Minta **MENTERI PERTAHANAN** menyatakan tentang status terkini pembinaan kesemua kapal *Littoral Combat Ship* oleh Boustead Naval Shipyard.

JAWAPAN

Tuan Yang di-Pertua,

Status pembinaan Kapal Littoral Combat Ship sehingga 1 November 2020 adalah 57.01% berbanding dengan perancangan asal 90.11%, iaitu kelewatan sebanyak 33.10%. Status pembinaan mengikut kapal adalah seperti berikut:

1. **LCS 1** - status siap semasa 60.60%;
2. **LCS 2** - status siap semasa 48.09%;
3. **LCS 3** - status siap semasa 43.75%;
4. **LCS 4** - status siap semasa 36.49%;
5. **LCS 5** - status siap semasa 22.09%; dan
6. **LCS 6** - status siap semasa 0%.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 7 DISEMBER 2020 (ISNIN)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI KEWANGAN** menyatakan apakah pendirian Kerajaan dalam melanjutkan pemberian moratorium. Apakah alternatif lain yang dapat diberikan kepada rakyat dalam membantu mengurangkan tekanan kewangan isi rumah semasa menghadapi cabaran pandemik COVID-19.

JAWAPAN

Tuan Yang Di-Pertua,

1. Kerajaan telah memberikan moratorium secara menyeluruh ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara menyeluruh berkenaan berakhir. Bermula pada 1 Oktober 2020, Kerajaan telah melaksanakan moratorium secara bersasar khusus kepada individu, isi rumah atau PKS yang kehilangan pekerjaan dan pendapatan mereka terjejas sepanjang tahun 2020 sehingga tahun 2021.

2. Selain daripada kemudahan moratorium tersebut, Kerajaan juga telah memperkenalkan beberapa inisiatif khusus yang bertujuan untuk turut membantu mengurangkan beban tekanan kewangan isi rumah seperti:-

- a. Pemberian tunai *one-off* melalui tambahan RM100 bagi Bantuan Sara Hidup (BSH) dan pelaksanaan pemberian tunai *one-off* Bantuan Prihatin Nasional (BPN) yang pertama kali mensasarkan bayaran bantuan kepada golongan M40 di samping golongan B40. Kerajaan kemudiannya membuat keputusan dengan meneruskan bantuan pemberian tunai ini melalui Bantuan Prihatin Nasional 2.0 (BPN 2.0).
- b. Bantuan tunai kepada golongan mudah terjejas meliputi Orang Kurang Upaya, ibu tunggal serta sukarelawan Khidmat Bantu di Rumah.
- c. Bantuan tunai turut disalurkan kepada golongan pemandu teksi, pemandu pelancong dan pemandu *e-hailing* serta bantuan khas kepada pelajar di Institusi Pengajian Tinggi (IPT). Kesemua bantuan ini merupakan inisiatif berbentuk *one-off* yang bertujuan membantu rakyat dalam tempoh jangka masa pendek.

3. Kerajaan turut mengurangkan bebanan rakyat yang mempunyai keperluan kesihatan melalui Skim Peduli Kesihatan untuk Kumpulan B40 (PEKA B40) yang dikawal selia oleh Kementerian Kesihatan Malaysia.

4. Selain itu, pemberian diskaun bil elektrik yang mana para pengguna domestik akan memperoleh diskaun bermula dari dua hingga 50 peratus berdasarkan jumlah penggunaan elektrik bulanan. Di samping itu, Kerajaan turut memperkenalkan subsidi tambang pengangkutan awam MY30 dalam menggalakkan mobiliti dan mengurangkan beban kos pengangkutan melalui pas perjalanan bulanan tanpa had di sekitar Lembah Klang kepada rakyat.

5. Dalam usaha mengurangkan bilangan rakyat yang terjejas dan peningkatan pada jumlah pengangguran, Kerajaan telah mengumumkan Program Subsidi Upah atau (PSU) yang merupakan bantuan kewangan untuk membantu majikan yang terkesan dari segi ekonomi akibat COVID-19 supaya dapat meneruskan operasi syarikat serta mengelakkan pekerja hilang pekerjaan dan punca pendapatan.

6. Kerajaan turut memperkenalkan Program Kemahiran dan Peningkatan Kemahiran bagi meningkatkan kebolehpasaran bagi golongan belia dan penganggur melalui program latihan yang disediakan dapat memanfaatkan hampir 200,000 belia dan penganggur. Beberapa Kementerian dan agensi telah dipertanggungjawab untuk melaksanakan program “*reskilling & upskilling*” dan menyediakan tenaga kerja yang dapat memenuhi kehendak industri.

Tuan Yang Di-Pertua,

7. Selain itu, terdapat pelbagai inisiatif tambahan telah diumumkan dalam Belanjawan 2021 pada 6 November yang lalu bagi membantu kewangan isi rumah yang masih terjejas akibat pandemik COVID-19 antaranya ialah:-

- a. Bantuan Prihatin Rakyat (BPR) merupakan bantuan kewangan sehingga RM1,800 kepada isi rumah yang layak. BPR merupakan penambahbaikan kepada BSH di mana bukan

sahaja golongan sasar diperluaskan, nilai bantuan yang diberikan juga telah ditingkatkan;

- b. Pelanjutan tempoh moratorium bagi golongan B40 atau pengurangan 50% bayaran pinjaman selama 6 bulan bagi yang layak;
- c. Pengurangan cukai pendapatan sebanyak 1% bagi pendapatan bercukai RM50,001-RM70,000;
- d. Pelanjutan inisiatif pas perjalanan tanpa had My30 bagi perkhidmatan bas dan rel dengan peruntukan sebanyak RM300 juta;
- e. Pengurangan kadar caruman minimum KWSP pekerja dari 11% kepada 9% mulai Januari 2021 untuk tempoh 12 bulan; dan
- f. Pengeluaran simpanan KWSP Akaun 1 secara bersasar bagi ahli yang kehilangan pekerjaan iaitu pengeluaran RM500 sebulan sehingga RM6,000 untuk 12 bulan.

8. Kerajaan komited dalam memastikan semua program yang sedang berlangsung dan yang telah dicadangkan bagi tahun 2021 akan dilaksanakan secara cekap dan berkesan melalui unit LAKSANA di bawah kementerian kewangan. Saya sendiri akan melaporkan kemajuan pelaksanaan inisiatif-inisiatif berkenaan setiap minggu.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SRI TAJUDDIN ABDUL RAHMAN
[PASIR SALAK]**

TARIKH : 7 DISEMBER 2020 (ISNIN)

SOALAN

DATO' SRI TAJUDDIN ABDUL RAHMAN [PASIR SALAK] minta **MENTERI KEWANGAN** menyatakan nama-nama Syarikat milik Kerajaan yang diperbadankan (Syarikat MKD) yang telah di "*bail out*", jika ada oleh Kerajaan dan implikasi kewangan kepada negara.

JAWAPAN

Tuan Yang Dipertua,

1. Untuk makluman Ahli Yang Berhormat, Menteri Kewangan (Diperbadankan) [MKD] adalah sebuah badan korporat yang ditubuhkan di bawah Akta Menteri Kewangan (Pemerbadanan) 1957.
2. Syarikat MKD yang merupakan entiti korporat turut terdedah kepada pelbagai risiko yang boleh menjejaskan operasi dan kelangsungan syarikat. Contohnya, yang paling mutakhir adalah penularan wabak COVID-19, bukan sahaja menjejaskan aktiviti ekonomi di Malaysia malah di seluruh dunia. Kesannya meluas kepada pelbagai lapisan industri, ada yang terpaksa mengecilkan saiz operasi dan mengurangkan pekerja malah ada yang tiada pilihan dan terpaksa ditutup.
3. Sekiranya keadaan seperti ini berlaku, syarikat-syarikat MKD juga tidak terkecuali dan turut merasai kesannya dan terdapat syarikat yang mengalami masalah aliran tunai sehingga menjejaskan rizab sumber kewangan untuk terus bertahan (*survive*). Oleh itu, Kementerian Kewangan selaku pemilik syarikat atau pemegang saham majoriti perlu mengambil langkah intervensi termasuk melalui penstrukturan semula syarikat – *corporate restructuring* dan suntikan modal untuk membantu kelangsungan syarikat dan memastikan perkhidmatan yang diberikan kepada rakyat tidak terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 07 DISEMBER 2020 (ISNIN)

SOALAN

Minta **MENTERI PENDIDIKAN** menyatakan menjelaskan hala tuju Dewan Bahasa dan Pustaka di bawah pentadbiran Kerajaan sekarang terkait secara khususnya berkenaan Kempen Malaysia Membaca, Dekad Membaca Kebangsaan, Dasar Buku Kebangsaan dan Dasar Sastera Kebangsaan.

JAWAPAN

Tuan Yang di-Pertua,

Kementerian Pendidikan Malaysia (KPM) khususnya melalui Dewan Bahasa dan Pustaka (DBP) amat prihatin akan kepentingan industri buku kepada negara. Usaha berterusan dilaksanakan bagi mempergiatkan program dan aktiviti termasuk Kempen Membaca Kebangsaan, Dekad Membaca Kebangsaan, meneliti semula Dasar Buku Negara dan menyediakan Dasar Sastera Negara.

Untuk makluman Ahli Yang Berhormat, Kempen Membaca Kebangsaan yang diusahakan selama tiga tahun, iaitu mulai tahun 2018 hingga 2020 masih diteruskan melalui pelbagai program dan aktiviti berkaitan dengan pembacaan. Berdasarkan rekod DBP, dari bulan Januari 2020 hingga November 2020, sebanyak 2,175 program telah dianjurkan dengan penglibatan seramai 3,280,843 orang peserta. Program Kempen Membaca Kebangsaan telah dilaksanakan oleh DBP dengan kerjasama pelbagai institusi termasuklah KPM, jabatan pendidikan negeri, perpustakaan dan pelbagai kementerian lain serta melibatkan pelbagai khalayak yang terdiri daripada pihak swasta dan masyarakat awam.

Program Dekad Membaca Kebangsaan pula telah dilancarkan pada 13 Februari 2020 dan akan dilaksanakan bermula pada tahun 2021 hingga 2030. Dekad Membaca Kebangsaan bermatlamat untuk menjadikan amalan membaca sebagai satu budaya yang membentuk masyarakat berpengetahuan, berilmu dan bermaklumat. Demi mencapai matlamat ini, enam hala tuju yang menjadi paksi gerakan Dekad Membaca Kebangsaan adalah seperti yang berikut:

- a) Meningkatkan penglibatan pelbagai pihak merentas kementerian dan agensi kerajaan, sektor korporat dan swasta, syarikat berkaitan kerajaan (GLC) dan pertubuhan bukan kerajaan (NGO) dalam program ini;

- b) Meningkatkan prasarana membaca secara berperingkat dan menambah nilai prasarana sedia ada sebagai pusat tumpuan aktiviti membaca;
- c) Meningkatkan penyertaan sektor korporat dan swasta dengan penyumbangan dana dan tajaan di bawah program Rakan Membaca Kebangsaan;
- d) Memperkukuh penyertaan media dan badan penyiaran dalam memperhebat pengiklanan dan promosi di seluruh negara;
- e) Mengupayakan laman sesawang dan media sosial seperti Facebook, Instagram, Twitter dan YouTube secara meluas; dan
- f) Meningkatkan bahan bacaan dalam bentuk digital.

Untuk makluman Ahli Yang Berhormat, DBP sedang menyediakan Dasar Sastera Kebangsaan (DSK). DBP telah merujuk dan mendapatkan ulasan serta pandangan daripada Sektor Pendidikan KPM, Jabatan Pengajian Tinggi, Penasihat Undang-undang KPM selain ulasan daripada pakar sastera Melayu dari universiti tempatan untuk menambah baik DSK dari sudut pandangan pakar bidang dan pihak yang berkepentingan. DSK merupakan pernyataan kerajaan dalam menentukan hala tuju dan menetapkan prinsip-prinsip asas pemartabatan kesusasteraan kebangsaan. Penggubalan DSK juga bertujuan untuk merencanakan dan melonjakkan penciptaan, pengembangan dan pengiktirafan karya sastera yang bermutu dalam kalangan penulis dan sasterawan Malaysia.

Berhubung dengan Dasar Buku Negara pula, perkara ini adalah di bawah kendalian dan penyelarasan Urus Setia Tetap Majlis Buku Kebangsaan Malaysia (MBKM).

Secara keseluruhannya, DBP akan terus melaksanakan mandat yang diberikan oleh kerajaan bagi memastikan bahasa dan sastera Melayu dimartabatkan melalui penganjuran program yang bersesuaian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 7 DISEMBER 2020 (ISNIN)

SOALAN

Minta **MENTERI PENGAJIAN TINGGI** menyatakan adakah telah diwujudkan garis panduan yang jelas bagi memudahkan pihak luar sama ada individu mahupun syarikat di dalam ikhtiar mereka membantu meringankan beban pihak pengurusan universiti dan KPT khususnya dalam menangani isu mahasiswa yang terkandas di IPT masing-masing sepanjang pelaksanaan penutupan kampus dan penangguhan kemasukan pelajar secara fizikal.

JAWAPAN

Tuan Yang di-Pertua,

Kementerian mengalu-alukan segala sumbangan dan peranan oleh pihak luar termasuk NGO; agensi; syarikat; atau individu untuk tampil sama-sama berganding bahu menghulurkan bantuan kepada pelajar di universiti awam. Walau bagaimanapun, peraturan atau arahan pentadbiran di setiap IPT perlu sentiasa dipatuhi bagi mengelakkan risiko jangkitan dan berlakunya salah faham atau pelanggaran SOP yang telah ditetapkan oleh MKN dan KKM. Garis panduan untuk pihak luar atau individu yang ingin menyalurkan sebarang bantuan atau sumbangan adalah tertakluk kepada garis panduan yang telah ditetapkan oleh setiap IPT.

Justeru, agensi atau individu yang ingin menghulurkan bantuan kepada pelajar atau universiti boleh terus menghubungi Bilik Gerakan di Kementerian atau Pengurusan Universiti (Bahagian Hal ehwal Pelajar) melalui talian hotline di universiti-universiti awam yang berkenaan bagi mendapatkan panduan dan tatacara untuk menghulurkan bantuan.

Untuk makluman Ahli Yang Berhormat, semua kemudahan di kampus, termasuk kafe dan kedai runcit masih tetap beroperasi dan pelajar yang masih berada di kampus juga turut dibenarkan keluar masuk dari universiti untuk membeli barang keperluan harian atau makanan tertakluk kepada SOP yang ditetapkan oleh IPT masing-masing. Pihak pengurusan universiti awam juga menyediakan insentif kewangan; pemberian pelan data dan peranti secara percuma atau pada harga tawaran istimewa; elaun sara hidup; dan bantuan makanan kepada pelajar berkeperluan. Usaha ini adalah untuk pastikan keperluan pelajar yang berada di kampus disediakan secukupnya dan kebajikan mereka dijaga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN
YAAKUB [MACHANG]**

TARIKH : 7 DISEMBER 2020 (ISNIN)

SOALAN

Minta **MENTERI PENGAJIAN TINGGI** menyatakan adakah Kementerian akan memberi rebat atau potongan yuran pengajian dan yuran kemudahan lain kepada pelajar-pelajar di Institusi Pengajian Tinggi Awam memandangkan kelas dan kemudahan tidak digunakan sepenuhnya sewaktu Perintah Kawalan Pergerakan (PKP) dijalankan Mac 2020.

JAWAPAN

Tuan Yang di-Pertua,

Kementerian amat prihatin dan mengambil berat terhadap keperluan para pelajar IPT untuk menjelaskan yuran pengajian mereka. Untuk makluman Ahli Yang Berhormat, secara amnya, pelajar di universiti awam (UA) hanya membayar dua (2) hingga 10 peratus sahaja daripada kos sebenar program akademik manakala 90 hingga 98 peratus kos yuran pengajian dibiayai melalui subsidi oleh Kerajaan. Sebagai contoh, purata yuran bagi pengajian Sarjana Muda Perubatan di UA yang perlu dibayar oleh pelajar ialah sebanyak RM10,046 iaitu bersamaan dua (2) peratus daripada kos sebenar pengajian yang berjumlah RM451,929. Manakala bakinya, sebanyak RM441,883 dibiayai oleh subsidi Kerajaan.

Kementerian telah membuat rundingan dengan pihak Kementerian Kewangan Malaysia (MOF) bagi mengurangkan bebanan kewangan pelajar. Sebagai tanda keprihatinan, Kerajaan telah bersetuju untuk mengurangkan kadar yuran asrama dan yuran aktiviti atau perkhidmatan UA sehingga 15 peratus setelah mengambil kira keupayaan kewangan Kerajaan dan UA. Pengurangan yuran tersebut adalah bagi Semester Kedua Sesi Akademik 2019/2020 untuk pelajar warganegara Malaysia. Pengurangan yuran ini melibatkan peruntukan sebanyak RM72 juta yang mana RM20 juta merupakan peruntukan tambahan Kerajaan dan RM52 juta menggunakan sumber dalaman UA. Seramai 523,318 pelajar UA di seluruh negara dijangka mendapat manfaat daripada keputusan ini. Langkah yang sama juga telah diteruskan bagi pengajian Semester 1 Sesi 2020/2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN BARU BIAN [SELANGAU]

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan apakah Kerajaan mempunyai peruntukan untuk pemeliharaan atau pengajaran bahasa ibunda atau bahasa etnik di sekolah, yang diperuntukan dalam seksyen 2 Akta Pendidikan 1996, walaupun kumpulan etnik tersebut dianggap sebagai kumpulan kecil seperti Lun Bawang.

JAWAPAN

Tuan Yang di-Pertua,

Tafsiran “sekolah kebangsaan” dan “sekolah menengah kebangsaan” dalam seksyen 2 Akta Pendidikan 1996 [Akta 550] memperuntukkan, antara lainnya, di mana kemudahan bagi pengajaran bahasa kaum asli hendaklah diadakan jika didapati munasabah dan praktik untuk berbuat sedemikian dan jika ibu bapa sekurang-kurangnya dari lima belas orang murid di sekolah itu memintanya.

Namun begitu, pelaksanaan ini tertakluk kepada beberapa faktor, termasuklah kapasiti professional dan keupayaan pengoperasian. Penetapan ini adalah untuk memastikan bahasa etnik yang hendak dilaksanakan dapat ditawarkan secara berterusan dan pelaksanaannya di sekolah dapat disokong dengan aktiviti pengajaran dan pembelajaran (PdP) serta pentaksiran yang berkesan. Selain itu, pelaksanaan ini juga

memerlukan guru yang berkeelayakan dan mampu menyampaikan pengajaran bahasa etnik tersebut dengan efektif untuk PdP.

Kementerian Pendidikan Malaysia (KPM) menyedari bahawa terdapat keperluan untuk menyediakan kemudahan PdP bahasa untuk beberapa etnik utama. Buat masa ini, KPM telah melaksanakan pembelajaran Bahasa Iban, Bahasa Kadazandusun dan Bahasa Semai di sekolah kebangsaan dan sekolah menengah kebangsaan.

Untuk makluman Ahli Yang Berhormat, penggubalan kurikulum bahasa etnik perlu mengambil kira beberapa aspek seperti korpus bahasa yang luas agar dapat menyokong aktiviti pengajaran dan pembelajaran yang berterusan. Selain itu, sistem bahasa yang termasuk sistem ejaan, tulisan dan tatabahasa bahasa tersebut perlu dikaji secara ilmiah bagi memastikan PdP dapat disampaikan dengan lebih terancang dan sistematik. Ini bertujuan untuk mengelakkan percanggahan pendapat dalam aspek penggunaan tatabahasa dan sistem ejaan dalam penulisan. Selanjutnya, variasi bahasa yang dipilih untuk ditawarkan perlu mendapat sokongan majoriti dari masyarakat agar tidak menimbulkan isu ketidakfahaman murid dan guru serta masyarakat setempat. Sehubungan dengan itu, tenaga pengajar yang berkeelayakan dan sebaik-baiknya guru opsyen perlu disediakan bagi memastikan pengajaran dan pembelajaran di dalam bilik darjah berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : DR AZMAN BIN ISMAIL [KUALA KEDAH]

TARIKH : 7 DISEMBER 2020 (ISNIN)

SOALAN

DR AZMAN BIN ISMAIL [KUALA KEDAH] minta **MENTERI KEWANGAN** menyatakan jumlah besar kesemua dana negara yang telah dibelanjakan dalam menangani pandemik COVID-19. Minta diberikan butiran kasar perbelanjaan tersebut.

JAWAPAN

Tuan Yang di-Pertua,

1. Untuk makluman Yang Berhormat, setakat 30 September 2020, Kerajaan telah menyediakan pelbagai peruntukan bagi perbelanjaan yang berkaitan dengan COVID-19. Dana yang disediakan setakat ini adalah di bawah Kumpulan Wang COVID-19 adalah seperti berikut:-

BIL.	PERKARA	KEMENTERIAN / AGENSI	JUMLAH (RM JUTA)
1.	Peruntukan bagi perbelanjaan berkaitan COVID-19	Kementerian Kesihatan	1,000
2.	Bantuan Perbelanjaan berkaitan COVID-19	Agensi Pengurusan Bencana Negara	150
3.	Bantuan repatriasi dan konsular kepada rakyat Malaysia yang terkandas di luar negara	Kementerian Luar Negeri	25
4.	Sanitasi Awam di Zon Merah dan Pusat Kuarantin	Kementerian Perumahan dan Kerajaan Tempatan	30
5.	Elaun Khas COVID-19 – Petugas Barisan Hadapan	Pelbagai Kementerian	600
JUMLAH BESAR			1,805

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI DR. AHMAD ZAHID
BIN HAMIDI [BAGAN DATUK]**

TARIKH : 7 DISEMBER 2020 (ISNIN)

SOALAN

DATO' SERI DR. AHMAD ZAHID BIN HAMIDI [BAGAN DATUK] minta **MENTERI KEWANGAN** menyatakan berapa jumlah kos kewangan untuk melanjutkan tempoh moratorium pinjaman dan berapakah permohonan yang diluluskan.

JAWAPAN

Tuan Yang Di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan yang lebih bersasar akan terus diberikan meskipun selepas moratorium secara menyeluruh berakhir.
2. Seperti yang telah diumumkan dalam laporan LAKSANA, nilai yang dianggarkan untuk moratorium menyeluruh selama 6 bulan berjumlah kira-kira RM100 bilion, dengan kira-kira RM35 bilion kepada PKS dan RM65 bilion kepada peminjam individu. Seramai 7.7 juta peminjam individu dan 243,000 PKS yang telah menikmati kemudahan ini.
3. Setakat ini, lebih 700,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:
 - a. 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
 - b. 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

Tuan Yang Di-Pertua,

4. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan pada masa sekarang tempat penduduk ramai kaum India di taman sekitar tidak mempunyai sekolah SJKT. Mereka memerlukan sebuah sekolah di sekitar kawasan tersebut. Di masa yang sama Kementerian Pendidikan perlu membuat kajian dan rancangan masa depan untuk mengalih sekolah SJK(T) kurang murid ke tempat yang dipohon oleh penduduk setempat.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan yang selesa kepada semua murid di seluruh negara. Sehingga November 2020, terdapat 162 buah Sekolah Jenis Kebangsaan Tamil berstatus sekolah kerajaan dan 365 buah Sekolah Jenis Kebangsaan Tamil berstatus sekolah bantuan kerajaan.

Berdasarkan rekod KPM, sejak tahun 2011 sehingga 2020, terdapat 23 permohonan pindah lokasi melibatkan Sekolah Jenis Kebangsaan Tamil (SJKT). Antara faktor utama permohonan pindah lokasi adalah disebabkan perkara seperti berikut:

- a) tapak sekolah asal diambil semula oleh pemilik;

- b) penurunan kadar enrolmen; dan
- c) keadaan tapak di lokasi asal yang tidak selamat.

Untuk makluman Ahli Yang Berhormat, sesebuah sekolah bantuan kerajaan yang berpindah lokasi perlu mendapatkan persetujuan bertulis 100% ibu bapa/penjaga. Pihak Lembaga Pengelola Sekolah (LPS) juga perlu membiayai sepenuhnya kos pemilikan tapak di lokasi baharu dan pembinaan bangunan sekolah di tapak baharu tersebut.

Berkaitan dengan sekolah kurang murid (SKM) pula, KPM telah merangka beberapa strategi bagi menangani SKM di bawah inisiatif Pelaksanaan Pelan Hala Tuju SKM. Satu Jawatankuasa *Task Force* Pelan Hala Tuju SKM telah dibentuk bagi memastikan semua perkara yang berkaitan dapat dilaksanakan dengan berkesan. Di bawah Pelan Hala Tuju SKM ini, KPM sedang meneliti mana-mana SKM yang berpotensi untuk digabungkan. Strategi penggabungan adalah melibatkan penggabungan SKM dengan sekolah lain yang berhampiran. Penggabungan sekolah berkenaan boleh dilaksanakan antara SKM atau SKM dan bukan SKM. Penggabungan SKM boleh dilaksanakan jika sekolah berada dalam lingkungan 5 kilometer dan dalam kalangan jenis sekolah yang sama. Manakala, bagi SKM yang tidak boleh digabung atau dipindahkan seperti di kawasan pedalaman dan pulau, sekolah berkenaan akan dikekalkan demi memastikan kelangsungan pendidikan kepada murid di kawasan berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI ABDUL HADI BIN AWANG
[MARANG]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan apakah perancangan Kementerian bagi memastikan kebajikan dan keperluan warga pendidik terjamin dalam menghadapi fasa COVID-19 yang memberi kesan kepada fokus pengajaran sekolah hari ini.

JAWAPAN

Tuan Yang di-Pertua,

Sektor pendidikan adalah antara sektor yang amat terkesan dengan pandemik COVID-19. Sejumlah lebih lima juta orang murid tidak dapat hadir ke sekolah dan mengikuti pembelajaran secara bersemuka. Selain itu, lebih 500,000 orang guru perlu menggunakan pelbagai pendekatan dalam meneruskan sesi pengajaran dan pembelajaran (PdP).

Untuk makluman Ahli Yang Berhormat, bagi memenuhi keperluan guru menjalankan sesi PdP semasa sekolah ditutup berikutan pelaksanaan Perintah Kawalan Pergerakan (PKP), KPM telah mengambil inisiatif dengan menyediakan Manual Pengajaran dan Pembelajaran di Rumah (PdPR). Manual ini adalah sebagai panduan kepada guru dalam melaksanakan PdPR secara berstruktur dan terancang supaya murid dapat mengikuti pembelajaran di rumah secara optimum. Manual PdPR ini meliputi pelbagai kaedah PdP yang dapat dilakukan dari rumah seperti

dalam talian (*online*), luar talian (*offline*), *off-site*, menggunakan modul pembelajaran dan berasaskan projek. Kaedah PdP ini dilaksanakan dengan mengikut kesesuaian guru dan murid.

KPM turut menyediakan pelantar pembelajaran Digital Educational Learning Initiative Malaysia (DELIMa) yang mempunyai pelbagai sumber pendidikan. Melalui pelantar ini, guru dapat menggunakan aplikasi dan sumber pembelajaran yang dimuat naik seperti penggunaan Google Classroom yang menyeluruh, capaian kepada bahan EduwebTV yang mengandungi pelbagai video pengajaran, bahan PdP daripada CikgooTube, buku teks digital dan pelbagai sumber lain.

Pelantar DELIMa juga mengandungi ruang ilmu untuk perkongsian bahan guru dan murid termasuk ruang khas yang menghimpunkan modul-modul kecemerlangan daripada Jabatan Pendidikan Negeri. Di samping itu, DELIMa juga dipautkan dengan Gerbang Portal negeri di mana kepelbagaian sumber bahan PdP dapat dicapai dengan lebih meluas.

KPM menyedari akan keperluan meningkatkan kompetensi guru dalam mempelbagaikan kaedah dan pendekatan PdP. Usaha ini dilaksanakan menerusi sesi webinar dan perkongsian video amalan terbaik guru dalam PdP. Selain daripada itu, kebajikan dan keselamatan guru ketika menjalankan tugas rasmi juga sentiasa menjadi keutamaan KPM.

KPM mengucapkan setinggi-tinggi penghargaan dan terima kasih kepada semua guru di atas segala usaha yang bersungguh-sungguh dalam melaksanakan tanggungjawab untuk memastikan murid dapat terus mengikuti pembelajaran dalam tempoh yang mencabar ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN YUSUF BIN ABD. WAHAB
[TANJONG MANIS]
TARIKH : 7 DISEMBER 2020 (ISNIN)

SOALAN

minta **MENTERI PENDIDIKAN** menyatakan bilakah baik pulih bangunan blok sekolah dan kawasan lapangan yang mendap untuk Sekolah Kebangsaan Orang Kaya Muda Pakeri (OKMP) di Kampung Paloh akan dilakukan.

JAWAPAN

Tuan Yang di-Pertua,

Untuk makluman Ahli Yang Berhormat, pemeriksaan awalan terhadap bangunan di Sekolah Kebangsaan Orang Kaya Muda Pakeri telah dilaksanakan oleh Jabatan Kerja Raya (JKR) Malaysia pada bulan September 2020. Hasil pemeriksaan mendapati terdapat kerosakan struktur dan masalah mendapan tanah di sekolah berkenaan. Kerosakan struktur bangunan dan lain-lain kerosakan yang dikenalpasti memerlukan pemeriksaan lanjut dari pihak JKR Malaysia. Walau bagaimanapun, pemeriksaan fizikal di tapak tidak dapat dibuat berikutan pelaksanaan Perintah Kawalan Pergerakan Bersyarat (PKPB) yang masih berkuat kuasa.

Bagi memastikan kerja-kerja pembaikan dapat dilaksanakan segera, Kementerian Pendidikan Malaysia (KPM) pada 26 November 2020 telah meminta pihak perunding projek membuat pemeriksaan lanjut. Pihak perunding juga perlu mengemukakan laporan kerosakan serta mencadangkan kaedah pembaikan sebelum 31 Disember 2020 untuk tindakan selanjutnya.

Untuk makluman Ahli Yang Berhormat, KPM menjangkakan kerja-kerja pembaikan bangunan blok sekolah dan kawasan lapangan yang mendap dapat dimulakan pada Mac 2021. Manakala, jangka masa pelaksanaan kerja-kerja pembaikan dianggarkan selama 12 bulan dengan mengambil kira tahap kerosakan dan kaedah pembaikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan berapa sekolah daif di Sarawak telah dinaik taraf dan dipulihkan dalam tahun 2019 dan 2020, status pelaksanaan projek dan perbelanjaan masing-masing dan bilangan murid yang dimanfaatkan dengan usaha ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memastikan infrastruktur fizikal sekolah berada dalam keadaan baik, berfungsi dan selamat digunakan oleh warga sekolah. Pemantauan keadaan fasiliti bangunan dan kemudahan sekolah dilaksanakan melalui Jabatan Pendidikan Negeri (JPN) dan Pejabat Pendidikan Daerah (PPD). Mulai tahun 2016 sehingga tahun 2020, sebanyak 291 buah sekolah di Sarawak yang mempunyai bangunan daif diluluskan untuk dinaik taraf dan dibangunkan semula dengan peruntukan berjumlah RM1.388 bilion.

Untuk makluman Ahli Yang Berhormat, bagi tahun 2019, sebanyak 73 buah sekolah yang mempunyai bangunan daif telah dinaik taraf dan dibangunkan semula dengan kos berjumlah RM450 juta. Bagi tahun 2020 pula, sebanyak 52 buah sekolah yang mempunyai bangunan daif telah diluluskan untuk dinaik taraf dan dibangunkan semula dengan kos projek berjumlah RM350 juta.

Sehingga 15 Oktober 2020, sebanyak 25 projek telah siap dan 32 projek masih dalam pembinaan. Manakala, baki 68 projek berada di dalam fasa pra bina. Dengan pelaksanaan naik taraf bangunan daif tersebut, seramai 23,700 orang murid di sekolah terlibat akan menerima manfaat serta dapat mengikuti pembelajaran di bangunan atau kelas yang selamat dan lebih selesa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN DATO' ABDULLAH SANI
BIN ABDUL HAMID [KAPAR]**

TARIKH : 7 DISEMBER 2020 (ISNIN)

SOALAN

TUAN DATO' ABDULLAH SANI BIN ABDUL HAMID [KAPAR] minta **MENTERI KEWANGAN** menyatakan jumlah sebenar yang telah dibelanjakan melalui program Pelan Jana Semula Ekonomi Negara (PENJANA) dan jumlah penerima bagi program tersebut. Apakah Kerajaan juga bercadang untuk menambah jumlah peruntukan kepada program ini berdasarkan pandemik COVID-19 yang dilihat belum ada kesudahan.

JAWAPAN

Tuan Yang di-Pertua,

1. Kerajaan telah mengumumkan Pelan Jana Semula Ekonomi Negara (PENJANA) pada 5 Jun 2020 dengan nilai RM35 bilion yang bertujuan untuk memulihkan dan menjana semula ekonomi negara dalam jangka masa pendek. Ia merupakan kesinambungan usaha pakej rangsangan ekonomi Kerajaan dalam terus membantu keadaan ekonomi semasa yang masih dalam fasa pemulihan.

2. Sehingga 20 November 2020, daripada RM35 bilion yang diperuntukkan bagi PENJANA, sebanyak RM14.58 bilion atau 42% telah dibelanjakan. Kemajuan perbelanjaan PENJANA adalah seperti berikut:-

- i. Bagi teras pertama yang bertujuan untuk memperkasakan rakyat, sebanyak RM7.15 bilion atau 54% daripada RM13.2 bilion telah dibelanjakan yang memanfaatkan sejumlah 1.36 juta penerima.
- ii. Bagi teras kedua yang bertujuan untuk melonjak perniagaan, sebanyak RM5.54 bilion atau 38% daripada RM14.7 bilion telah dibelanjakan yang telah memanfaatkan lebih daripada 40,000 perniagaan.
- iii. Bagi teras ketiga yang bertujuan untuk merangsang ekonomi, sebanyak RM1.9 bilion atau 27% daripada RM7.1 bilion telah dibelanjakan yang telah memanfaatkan sekitar 11.36 juta penerima.

3. Kerajaan kekal prihatin dengan keadaan ekonomi negara yang masih dalam fasa pemulihan ekonomi akibat pandemik COVID-19 dan pada 23 September 2020, YAB Perdana Menteri telah mengumumkan Kerangka Inisiatif Tambahan Khas: KITA PRIHATIN yang bernilai RM10 bilion. Pakej tambahan ini merupakan kesinambungan kepada pakej PRIHATIN dan PENJANA yang bertujuan meringankan beban rakyat, mengekalkan pekerjaan serta membantu perniagaan.

4. Inisiatif tambahan ini disalurkan melalui mekanisme Bantuan Prihatin Nasional 2.0 (BPN 2.0) sebanyak RM7 bilion, Program Subsidi Upah 2.0 sebanyak RM2.4 bilion dan Geran Khas PRIHATIN 2.0 (GKP 2.0) sebanyak RM600 juta. Ketiga-tiga kesinambungan inisiatif tersebut akan terus dapat membantu rakyat dan peniaga yang masih terjejas dalam fasa pemulihan tersebut. Selain itu, semasa pembentangan Belanjawan 2021 pada 6 November 2020 yang lalu, Kementerian Kewangan turut mengumumkan pelbagai inisiatif tambahan bagi membantu rakyat, golongan peniaga kecil dan PKS mikro serta sektor ekonomi.

5. Kerajaan akan memastikan semua program di bawah pakej-pakej rangsangan ekonomi dan inisiatif Belanjawan 2021 yang dirancang dan sedang berlangsung akan dilaksanakan secara cekap dan berkesan. Kementerian Kewangan melalui unit LAKSANA akan memantau setiap pelaksanaan inisiatif yang telah dibentangkan bagi memastikan ianya mencapai impak yang disasarkan serta mencadangkan langkah-langkah penambahbaikan sekiranya perlu. Pihak Kerajaan akan meneliti sebarang keperluan penambahan jumlah peruntukan di mana perlu tertakluk kepada kedudukan semasa kewangan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 7 DISEMBER 2020 (ISNIN)

SOALAN

Minta **MENTERI PENGAJIAN TINGGI** menyatakan pelan Kementerian di dalam memastikan bahawa kualiti graduan tidak terjejas akibat daripada gangguan pembelajaran berkaitan pandemik COVID-19.

JAWAPAN

Tuan Yang di-Pertua,

Kementerian amat mengambil berat terhadap kualiti graduan dan keberkesanan sesi Pengajaran dan Pembelajaran (PdP) khususnya secara dalam talian terutamanya semasa pandemik COVID-19. Secara umumnya, faktor-faktor yang mempengaruhi kualiti dan keberkesanan PdP secara dalam talian adalah:

- i. Ketersediaan infrastruktur komunikasi yang baik, bagi membolehkan pelajar dan pensyarah menjalankan sesi PdP. Bagi maksud ini, institusi pengajian tinggi (IPT) telah mengoptimumkan penggunaan platform seperti *Open Educational Resources* (OER), *Open CourseWare* (OCW), *Massive Open Online Courses* (MOOCs), *Learning Management System* (LMS), *BigBlueButton*, *Facebook Live*, *YouTube*, *Google Classroom*, *Google Meet*, *Zoom* dan *Microsoft Teams* untuk memastikan sesi pembelajaran secara maya dapat dijalankan dengan berkesan;

- ii. Kandungan modul pembelajaran yang berkualiti. Kementerian melalui Unit Jaminan Kualiti di IPT dan Majlis Ketua Penyelaras E-Pembelajaran IPTA Malaysia (MEIPTA) memantau secara dekat kualiti modul pembelajaran dalam talian dan keberkesanan sesi PdP yang dijalankan. Penambahbaikan secara berterusan akan dilaksanakan terhadap kandungan dan kaedah penyampaian sekiranya timbul sebarang masalah;
- iii. Kapasiti jalur lebar di IPT yang lebih tinggi bagi membolehkan pelajar mendapat akses internet dengan lebih baik. Kementerian melalui inisiatif *Malaysian Research & Education Network (MYREN)* akan melaksanakan peningkatan ke atas kapasiti jalur lebar di institusi pengajian tinggi awam (IPTA) kepada antara 500Mbps hingga 10Gbps dengan peruntukan sebanyak RM50;
- iv. Kemudahan peranti dan pelan data terutamanya kepada pelajar. Bagi tujuan ini, kementerian telah menyediakan bantuan berbentuk sumbangan pelan data bagi capaian internet kepada 320,396 pelajar dan bantuan pemilikan peranti kepada 8,965 pelajar daripada kalangan keluarga B40 di universiti-universiti awam. Anggaran peruntukan keseluruhan inisiatif ini berjumlah RM37.4 juta; dan
- v. Keupayaan dan kemahiran pensyarah mengendalikan sesi PdP. Kementerian melalui IPT melaksanakan latihan peningkatan kapasiti secara berterusan kepada pensyarah bagi meningkatkan kemahiran pengajaran secara dalam talian mereka.

Sebagai usaha untuk pastikan sesi PdP secara dalam talian dapat memberikan pembelajaran yang berkualiti dan tidak menjejaskan kualiti graduan, kementerian akan sentiasa memantau pelaksanaannya secara dekat dan melakukan penambahbaikan dari masa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan maklumat terkini proses pembinaan Sekolah Menengah Kebangsaan Pelangi Perdana Parit Buntar dan jadual terbaru siapnya sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan yang selesa kepada semua murid di seluruh negara.

Untuk makluman Ahli Yang Berhormat, Projek Pembinaan Sekolah Menengah Kebangsaan Pelangi Perdana, Parit Buntar, Perak telah diluluskan dalam *Rolling Plan* 1 (Tahun 2016) Rancangan Malaysia Ke-11. Skop projek ini meliputi pembinaan baharu 36 bilik darjah dan lain-lain kemudahan dengan kos projek berjumlah RM54 juta. Projek ini adalah di bawah seliaan KPM dan berada dalam fasa pembinaan.

Sehingga 31 November 2020, peratusan kemajuan projek adalah 11% berbanding jadual 78%. Projek ini telah mengalami kelewatan disebabkan isu tanah. Keadaan tapak projek SMK Pelangi Perdana masih dalam tempoh rawatan tanah (*soil improvement*) kerana tapak pembinaan sekolah adalah dalam kawasan sawah padi. Tempoh rawatan tanah telah bermula sejak bulan Oktober 2019 dan sepatutnya tamat pada Jun 2020. Namun, didapati keputusan pemampatan dan penurunan tanah hanya mencapai 55%. Oleh yang demikian, tempoh rawatan tanah perlu dilanjutkan sehingga Julai 2021. Pelaksanaan kerja-kerja pembinaan dijangka dapat disambung semula pada Ogos 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI MOHAMAD BIN SABU
[KOTA RAJA]**

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan rentetan kepadatan pelajar di beberapa sekolah khususnya di Sekolah Menengah Kota Kemuning yang mempunyai 5000 orang pelajar dan jumlah pelajar menjangkau 50 orang sekelas, apakah rancangan pihak Kementerian untuk menangani hal ini. Disebabkan pertambahan penduduk yang semakin meningkat, maka keperluan untuk dibina sekolah menengah baru amat diperlukan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan yang selesa kepada semua murid di seluruh negara. Berdasarkan rekod data KPM, SMK Kota Kemuning mempunyai 50 buah bilik darjah dan melaksanakan pengajaran dan pembelajaran dua sesi. Enrolmen murid SMK Kota Kemuning adalah seramai 3,439 orang dengan purata bilangan murid bagi setiap kelas adalah 40 orang murid. Oleh yang demikian, KPM berpandangan bahawa terdapat keperluan untuk membina sebuah sekolah baharu di kawasan ini.

Sehubungan dengan itu, KPM telah mengemukakan permohonan untuk pembinaan sekolah baharu 42 bilik darjah di Kota Kemuning dalam *Rolling Plan* 1 (Tahun 2021) Rancangan Malaysia Ke-12. Dalam sesi libat urus bersama-sama Kementerian Kewangan Malaysia dan Unit Perancang Ekonomi, Jabatan Perdana Menteri bagi Belanjawan 2021, KPM telah menekankan tentang keperluan mendesak untuk membina sekolah baharu di beberapa kawasan, termasuk di Kota Kemuning. KPM mengucapkan terima kasih kepada Kerajaan kerana telah meluluskan pembinaan beberapa sekolah baharu bagi tahun 2021, termasuk SMK Kota Kemuning 2.

Pembinaan sekolah baharu ini akan dapat mengatasi masalah kepadatan murid di SMK Kota Kemuning dan menampung keperluan pendidikan bagi penduduk di kawasan ini pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 7 DISEMBER 2020 (ISNIN)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KEWANGAN** menyatakan adakah pihak Kementerian berasa Pindaan “Akta Rumah Perjudian Terbuka 1953” adalah mencukupi untuk membanteras gejala judi haram yang semakin berleluasa di Malaysia. Adakah pihak Kementerian mempunyai strategi yang lebih berkesan dalam membanteras gejala judi haram yang berleluasa.

JAWAPAN

Tuan Yang di-Pertua,

1. Untuk makluman ahli dewan, Kementerian Kewangan hanya memantau semua aktiviti perjudian berlesen sahaja manakala aktiviti perjudian haram adalah di bawah bidang kuasa Kementerian Dalam Negeri.
2. Untuk makluman ahli dewan juga, Kementerian Kewangan sedang dalam semakan untuk meminda dan memperketatkan hukuman dan denda di bawah akta-akta perjudian sedia ada iaitu Akta Rumah Perjudian Terbuka 1953, Akta Pertaruhan Wang Terkumpul 1967, Akta Loteri 1952 dan Akta Pertaruhan 1953 bagi membendung aktiviti perjudian haram di Malaysia.
3. Tuan Yang di-Pertua, selain memperketatkan hukuman dan penalti mandatori di bawah Akta Rumah Perjudian Terbuka, Kerajaan sangat menggalakkan kerjasama semua pihak untuk menyalurkan sebarang maklumat berkenaan aktiviti perjudian haram di sekeliling kepada Polis Diraja Malaysia untuk diambil tindakan undang-undang.
4. Kerjasama dari setiap lapisan masyarakat untuk membanteras aktiviti perjudian haram diharap dapat membendung kegiatan perjudian haram secara lebih berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TENGKU ZULPURI BIN RAJA PUJI
[RAUB]
TARIKH : 7 DISEMBER 2020 (ISNIN)

Minta **MENTERI PENGAJIAN TINGGI** menyatakan:

- (a) Bagaimana inisiatif Kementerian untuk menangani isu pengangguran di kalangan graduan, malah peluang pekerjaan yang ditawarkan kepada graduan juga tidak setaraf kelulusan; dan
- (b) Sejauh mana juga usaha Kementerian dalam membantu para pekerja di sektor swasta khususnya pekerja kilang yang terpaksa berhenti kerja akibat penutupan kilang semasa krisis wabak COVID-19.

JAWAPAN

Tuan Yang di-Pertua,

Dalam menangani isu pengangguran di kalangan graduan, kementerian giat melaksanakan beberapa inisiatif antaranya adalah :

- i. Melaksanakan program *career advancement* atau KPT-CAP yang berbentuk latihan kemahiran jangka pendek dan sederhana. Sebanyak RM100 juta telah diperuntukan melalui Pelan Jana Semula Ekonomi Negara (PENJANA) bagi menjayakan inisiatif ini. Terdapat tiga (3) kluster utama yang menjadi tumpuan iaitu:

- a. Job Matching and Placement;
- b. Keusahawanan; dan
- c. Gig Economy.

Sebagai langkah ke hadapan, KPT sedang merangka peluasan pelaksanaan inisiatif ini melalui kolaborasi bersama kerajaan-kerajaan negeri melalui program *JOBs@State* dan *GRADpreneur@State*. Keseluruhan inisiatif PENJANA KPT-CAP dijangka dapat memberikan manfaat dan nilai tambah kepada sejumlah 20,000 graduan universiti awam, politeknik dan kolej komuniti;

- ii. Menawarkan bantuan kewangan kepada graduan yang ingin melanjutkan pengajian ke peringkat yang lebih tinggi. Antara bantuan tersebut adalah seperti MyBrain Science; Biasiswa Menteri Pengajian Tinggi dan Bantuan Kewangan pelajar OKU;
- iii. Melaksanakan program padanan pekerjaan kepada graduan dengan kerjasama Pertubuhan Kebajikan Sosial (PERKESO). Graduan-graduan yang berdaftar di Portal MyFutureJobs akan dipadankan dengan kekosongan jawatan di syarikat-syarikat yang telah berdaftar melalui portal tersebut. Sehingga 24 November 2020, sejumlah 192,186 graduan telah mendaftar untuk dipadankan dengan kekosongan perjawatan di dalam portal tersebut dan sejumlah 36,122 graduan telah mendapat penempatan;
- iv. Menggalakkan pelajar terlibat dalam bidang keusahawanan. Pelan Tindakan Keusahawanan IPT 2021-2025 yang sedang dimuktamadkan akan menjadi dokumen rujukan utama bagi pengukuhan agenda keusahawanan di IPT. Sepanjang tahun 2016 – 2019, seramai 49,983 orang pelajar telah menjalankan perniagaan dalam tempoh pengajian. Daripada jumlah tersebut, seramai 7,148 orang graduan masih meneruskan kerjaya mereka sebagai usahawan selepas tamat pengajian;

- v. Dalam konteks menyediakan ekosistem yang menyokong aktiviti keusahawanan di IPT, kementerian dengan kerjasama TEKUN Nasional telah memperkenalkan skim pembiayaan mikro *KPT-MEDAC:Siswapreneur*. Sejumlah RM20 juta telah diperuntukan oleh TEKUN Nasional dengan sasaran pembiayaan kepada 20,000 pelajar;
- vi. Manakala program *EntrepreneurMOHE@PUNB* pula telah dilaksanakan dengan kerjasama Perbadanan Usahawan Nasional Berhad (PUNB). Program latihan jangka pendek ini memberikan penekanan kepada kemahiran pengurusan; bimbingan teknikal bagi Pemasaran Digital; serta BizKonsultasi berbentuk khidmat nasihat berkaitan perniagaan daripada PUNB. Sebagai permulaan, 500 graduan akan mendapat manfaat daripada pelaksanaan program ini.

Berhubung penawaran pekerjaan yang tidak setaraf dengan kelulusan graduan, kementerian amat memahami situasi pandemik yang menjejaskan semua pihak termasuk industri. Keutamaan kementerian pada masa ini adalah untuk memastikan graduan berupaya untuk sekurang-kurangnya menjana pendapatan bagi menampung kehidupan mereka sama ada melalui pekerjaan; aktiviti keusahawanan atau secara 'free-lancing'.

Tuan Yang di-Pertua

- (a) Isu berkenaan membantu para pekerja di sektor swasta khususnya pekerja kilang yang terpaksa berhenti kerja akibat penutupan kilang semasa krisis wabak COVID-19 adalah terletak di bawah bidang kuasa pihak Kementerian Sumber Manusia. Walaubagaimanapun, pihak Kementerian Pengajian Tinggi sentiasa bersedia untuk bekerjasama dalam menyediakan input atau maklumat berkaitan sekiranya diperlukan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : YB DATUK ROZMAN BIN ISLI [LABUAN]

TARIKH : 7 DISEMBER 2020 (SELASA)

SOALAN

DATUK ROZMAN BIN ISLI [LABUAN] minta **MENTERI KOMUNIKASI DAN MULTIMEDIA** menyatakan apakah tahap pencapaian infrastruktur internet di Pulau Labuan pada masa ini dan adakah ianya mencukupi untuk Labuan yang bertaraf sebagai pusat kewangan antarabangsa dan hub logistik minyak dan gas.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian sentiasa memberi tumpuan kepada pembangunan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi untuk membolehkan rakyat menikmati akses kepada perkhidmatan jalur lebar berkelajuan tinggi yang lebih menyeluruh.

Bagi Pulau Labuan sehingga suku kedua 2020, sebanyak 13,825 premis telah diliputi dengan capaian rangkaian gentian optik. Manakala, kadar liputan jalur lebar mudah alih di kawasan berpenduduk untuk teknologi 4G berada pada tahap 97.40%. Sehingga kini, terdapat 112 struktur pemancar komunikasi yang telah beroperasi di Labuan.

Pelan Jalinan Digital Negara (JENDELA) telah dibangunkan secara kolektif oleh pihak pemain industri dan pihak Kerajaan bagi meningkatkan tahap kesalinghubungan dan kualiti pengalaman perkhidmatan komunikasi di seluruh negara yang akan memperluas liputan dan mempertingkatkan kualiti perkhidmatan jalur lebar melalui inisiatif-inisiatif yang telah dikenalpasti serta mempersiapkan negara ke arah teknologi 5G, termasuklah di Labuan.

Di bawah pelan JENDELA, sebanyak 5,281 premis akan disediakan akses kepada perkhidmatan berkelajuan Gigabit bagi meluaskan rangkaian gentian optik. Manakala untuk meluaskan liputan dan meningkatkan kualiti perkhidmatan jalur lebar mudah alih, terdapat satu menara baharu akan dibina manakala sebanyak 32 alat pemancar komunikasi sedia ada akan dinaik taraf kepada teknologi 4G di Labuan.

Pihak Suruhanjaya Komunikasi dan Multimedia Malaysia (SKMM) akan terus bekerjasama dengan pihak industri dan Perbadanan Labuan dalam mengenal pasti keperluan infrastruktur digital untuk menyokong Labuan sebagai pusat kewangan antarabangsa dan hub logistik minyak dan gas.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 7 DISEMBER 2020 (ISNIN)

SOALAN

TUAN PANG HOK LIONG [LABIS] minta **MENTERI KEWANGAN** menyatakan jumlah hutang luar negeri telah meningkat pada akhir suku ketiga (S3) berakhir September 2020:-

- (a) jumlah nilai hutang luar negeri pada akhir S3 tahun 2020 dan peratusannya daripada Keluaran Dalam Negara Kasar (KDNK) pada akhir S3 tahun 2020; dan
- (b) cara-cara dan tempoh masa untuk melangsaikan hutang tersebut.

JAWAPAN

Tuan Yang di-Pertua,

1. Hutang luar negeri didefinisikan sebagai pinjaman luar pesisir sektor awam dan swasta, pemegangan sekuriti hutang dalam denominasi ringgit oleh bukan pemastautin, deposit bukan pemastautin dan lain-lain hutang luar. Sehingga akhir September 2020, hutang luar negeri berjumlah RM953.3 bilion atau 66.2% daripada KDNK berbanding RM1,003 bilion atau 69.7% KDNK pada akhir-Jun 2020. Pengurangan ini terutamanya disebabkan pembayaran balik bersih peminjaman antara bank dan kesan penilaian berikutan pengukuhan nilai ringgit berbanding mata wang asing utama dan serantau terpilih pada suku ketiga 2020.

2. Secara amnya, risiko hutang luar negeri Malaysia kekal terurus berdasarkan kepada profil mata wang, tempoh matang dan jenis instrumen hutang. Struktur hutang luar negeri ini membolehkan entiti yang berhutang memenuhi obligasi hutang walaupun ketika ekonomi negara dilanda kejutan luaran.

Tuan Yang di-Pertua,

3. Daripada aspek struktur profil mata wang, hampir satu pertiga daripada hutang luar negeri adalah dalam denominasi ringgit melalui pemegangan hutang oleh bukan pemastautin. Oleh itu, hutang berdenominasi ringgit ini tidak tertakluk kepada kesan perubahan penilaian akibat perubahan dalam kadar pertukaran ringgit. Pasaran kewangan yang mendalam, keadaan mudah tunai domestik yang mencukupi dan pelabur institusi domestik yang besar dan teguh dapat mengurangkan risiko pembiayaan semula apabila terdapat aliran keluar modal oleh pelabur bukan pemastautin.

4. Dari aspek profil kematangan pula, hutang luar negeri berjangka masa sederhana dan panjang iaitu melebihi satu tahun meliputi 61.2% daripada jumlah hutang luar negeri menunjukkan risiko pembiayaan semula yang rendah kerana tidak memerlukan pembayaran balik hutang dalam tempoh segera.

5. Selain itu, 76.2% daripada hutang luar negeri adalah terdiri daripada hutang oleh institusi perbankan dan syarikat korporat. Risiko hutang luar negeri institusi perbankan adalah terurus di mana sekitar 80% merupakan peminjaman antara kumpulan bank, yang pada amnya stabil. Risiko hutang luar negeri oleh syarikat korporat juga rendah disebabkan antara lain terbitan bon dan nota untuk memperoleh aset luar negeri. Pendapatan yang dijana daripada aset luar negeri ini boleh digunakan untuk menampung pembayaran balik hutang pada masa hadapan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN P. PRABAKARAN [BATU]

TARIKH : 7 DISEMBER 2020 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan status cadangan membina kawasan merokok di setiap kawasan awam termasuk kawasan perumahan awam. Jika sudah dilaksanakan, berapa kawasan yang telah menerima pelaksanaan tersebut dan berapakah perbelanjaan yang telah dibelanja daripada peruntukan RM1 juta.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) menyokong sepenuhnya inisiatif Kementerian Kesihatan Malaysia (KKM) berhubung larangan merokok di tempat makan yang berkuat kuasa bermula 1 Januari 2020. Pada prinsipnya, penyediaan kawasan khas merokok oleh KPKT bukan bertujuan menggalakkan orang merokok, tetapi bagi memastikan perokok merokok di suatu kawasan yang diasingkan daripada orang awam.

2. Sehingga kini, KPKT telah menyalurkan peruntukan kepada Majlis Perbandaran Ampang (MPAJ) bagi membina sebuah kawasan merokok di Santai@Ampang Point dengan kos sebanyak RM20,000. Kawasan merokok ini berada dalam lingkungan jarak 3 meter dari tempat makan awam. Permohonan dari kawasan lain akan dipertimbangkan setelah menerima permohonan dari Pihak Berkuasa Tempatan (PBT).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 7 DISEMBER 2020 (ISNIN)

SOALAN

Minta **MENTERI PENDIDIKAN** menyatakan apakah justifikasi atau faktor yang menyebabkan pihak KPM mengurangkan peruntukan penyelenggaraan Sekolah Jenis Kebangsaan Tamil (SJKT) kepada hanya RM29.98 juta sahaja pada tahun 2021, berbanding dengan RM50 juta ketika ini.

JAWAPAN

Tuan Yang di-Pertua,

Untuk makluman Ahli Yang Berhormat, sejumlah RM800 juta diperuntukkan bagi tujuan penyelenggaraan sekolah dan institusi pendidikan di bawah pengendalian Kementerian Pendidikan (KPM). KPM juga diberi tanggungjawab sepenuhnya dalam menguruskan pengagihan peruntukan tersebut. Mengikut Akta Pendidikan 1996, adalah menjadi tanggungjawab Kerajaan untuk menyelenggara sepenuhnya sekolah kerajaan. Pada masa yang sama, kerajaan boleh memberi sumbangan bantuan kepada sekolah bantuan kerajaan.

Secara relatifnya, peruntukan penyelenggaraan yang diterima agak terhad berdasarkan jumlah sekolah dan institusi pendidikan di bawah pengendalian KPM. Justeru, ia perlu diagihkan dengan cermat, teliti dan berhemat bagi memastikan impak yang optimum. Daripada peruntukan keseluruhan RM800 juta, pecahan agihan adalah seperti berikut:

- a) RM620 juta untuk penyelenggaraan sekolah di bawah pengendalian KPM;
- b) RM30 juta untuk peruntukan tambahan kritikal;
- c) RM50 juta untuk penyelenggaraan institusi pendidikan di bawah pengendalian KPM;
- d) RM50 juta untuk pembaikan cerun; dan
- e) RM50 juta untuk menaik taraf atau membina dewan terbuka.

Berkaitan dengan agihan peruntukan penyelenggaraan, KPM menggunakan formula yang mengambil kira bilangan dan jenis sekolah, sama ada kategori sekolah kerajaan atau sekolah bantuan kerajaan dalam membuat agihan peruntukan bagi tahun 2021. Asas perkiraan adalah berdasarkan purata daripada peruntukan RM620 juta bagi 10,223 buah sekolah, iaitu sebanyak RM60,648 setiap sekolah. Siling peruntukan bagi sekolah bantuan kerajaan dikira berdasarkan 90 peratus

daripada purata tersebut didarabkan dengan bilangan 1,930 buah sekolah bantuan kerajaan. Ini menjadikan siling peruntukan untuk sekolah bantuan kerajaan adalah sebanyak RM105.34 juta.

Manakala, siling peruntukan bagi 8,293 buah sekolah kerajaan pula adalah berdasarkan peruntukan penyelenggaraan sekolah sebanyak RM620 juta ditolak siling sekolah bantuan kerajaan. Ini menjadikan siling peruntukan untuk sekolah kerajaan ialah RM514.66 juta.

Bagi Sekolah Jenis Kebangsaan Tamil (SJKT), sehingga November 2020, terdapat 162 buah SJKT berstatus sekolah kerajaan dan 365 buah SJKT berstatus sekolah bantuan kerajaan. Oleh yang demikian, berdasarkan bilangan sekolah dan jenis sekolah bagi SJKT, sama ada kategori sekolah kerajaan atau sekolah bantuan kerajaan, siling peruntukan penyelenggaraan bagi SJKT adalah sebanyak RM29.98 juta.

KPM sedar bahawa terdapat jenis sekolah yang menerima peruntukan siling yang lebih rendah berbanding yang lain. Untuk itu, sebanyak RM30 juta daripada RM750 juta peruntukan penyelenggaraan sekolah dan institusi pendidikan adalah dikhususkan bagi menampung mana-mana keperluan penyelenggaraan kritikal untuk jenis sekolah yang peruntukan silingnya adalah RM30 juta dan ke bawah.

Untuk makluman Ahli Yang Berhormat, penjelasan secara menyeluruh dan terperinci mengenai peruntukan penyelenggaraan sekolah dalam Belanjawan 2021, termasuk kaedah pengiraan, telah diberikan dalam ucapan penggulungan KPM pada 24 November 2020. Perincian kaedah agihan peruntukan adalah seperti dalam teks ucapan penuh dan lampiran yang telah dimuat naik di laman web Parlimen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 7 DISEMBER 2020 (ISNIN)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan keputusan Kerajaan Pusat berhubung permohonan Kerajaan Negeri Pulau Pinang agar menaikkan kadar pelepasan cukai individu untuk perbelanjaan pelancongan domestik susulan pengumuman Pakej Rangsangan Ekonomi 2020 pasca COVID-19 dari RM1,000 sedia ada kini kepada RM5,000. Perincian pelaksanaannya jika ia diluluskan dan nyatakan sebab sekiranya ia ditolak.

JAWAPAN

Tuan Yang Di-pertua,

1. Untuk makluman Yang Berhormat, cadangan kenaikan kadar pelepasan cukai individu bagi perjalanan domestik adalah tidak berbangkit memandangkan Kerajaan melalui Pakej Rangsangan Ekonomi telah pun mengumumkan pelepasan khas cukai pendapatan individu sehingga RM1,000 ke atas perbelanjaan perjalanan domestik bagi tempoh 1 Mac 2020 hingga 31 Disember 2020 dan dilanjutkan juga bagi tahun taksiran 2021 tertakluk kepada syarat seperti berikut:-

- i. Pertama, perbelanjaan penginapan dibuat di premis penginapan yang berdaftar dengan Kementerian Pelancongan, Seni dan Budaya Malaysia (MOTAC);
- ii. Kedua, pelepasan diberi ke atas bayaran masuk ke pusat tarikan pelancong; dan
- iii. Perbelanjaan di atas dibuat dalam tempoh 1 Mac 2020 hingga 31 Ogos 2020 dan 1 Januari 2021 hingga 31 Disember 2021.

2. Oleh itu, cadangan meningkatkan had pelepasan dari RM1,000 hingga RM5,000 telah dikaji dan ianya tidak dipertimbangkan pada masa ini.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 7 DISEMBER 2020 (ISNIN)

SOALAN

PUAN VIVIAN WONG SHIR YEE [SANDAKAN] minta **MENTERI KEWANGAN** menyatakan apakah komitmen Kerajaan untuk menyalurkan lebih banyak sumber dana kewangan ke Sabah bagi mengatasi krisis COVID-19 semasa dan pemulihan ekonomi negeri yang telah terjejas akibat wabak.

JAWAPAN

1. Untuk makluman Yang Berhormat, Kerajaan telah menyediakan pelbagai peruntukan bagi perbelanjaan berkaitan COVID-19 yang akan diagihkan berdasarkan kesesuaian dan status terkini keadaan COVID-19 di negeri-negeri. Bagi negeri Sabah, Kerajaan melalui Kementerian Kesihatan, telah menyalurkan peruntukan tambahan sebanyak RM44 juta untuk mengukuhkan barisan hadapan kesihatan negeri. Ini meliputi penambahan peralatan perlindungan diri, bekalan perubatan dan kelengkapan perubatan seperti katil pesakit serta alat bantuan pernafasan atau ventilators.

2. Selain itu, Kerajaan melalui Majlis Keselamatan Negara, baru-baru ini juga telah meluluskan peruntukan tambahan sebanyak RM50 juta kepada NADMA untuk menyokong usaha menangani penularan wabak tersebut. Kedua-dua peruntukan tambahan ini adalah selaras dengan komitmen bagi memastikan kesiapsiagaan dalam menghadapi peningkatan jangkitan COVID-19 di seluruh negara. Secara keseluruhan, dianggarkan sejumlah RM1.8 bilion telah disediakan bagi menangani krisis COVID-19 termasuk krisis di negeri Sabah.

3. Di samping itu, Kerajaan telah mengumumkan pemberian Geran Khas Prihatin Tambahan sebanyak 1,000 ringgit kepada peniaga dan penjaja di Sabah. Geran khas ini akan diberikan kepada pemandu teksi, e-hailing, kereta sewa dan pemandu pelancong di Sabah memandangkan mereka amat terjejas semasa pandemik ini.

4. Kerajaan juga akan menaikkan peruntukan daripada 150 juta kepada 200 juta ringgit untuk melaksanakan Program Pengedaran Barang Perlu, LPG dan Community Drumming termasuk meluaskan pelaksanaannya ke 34 kawasan baharu. Antara kawasan yang terlibat ialah di Pulau Sakar di Sabah dan Ulu Mujok di Sarawak. Melalui inisiatif ini, barangan asas seperti beras, gula, tepung, minyak masak, gas LPG, petrol RON95 dan diesel, dapat dinikmati oleh lebih 1.1 juta rakyat pada harga yang dikawal.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN WONG KAH WHO [IPOH TIMUR]

TARIKH : 7 DISEMBER 2020 (ISNIN)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan apakah inisiatif Kerajaan kepada rakyat secara keseluruhan untuk menghadapi gelombang baharu COVID-19 yang melanda, termasuk sama ada akan mengarahkan supaya moratorium dilanjutkan.

JAWAPAN

Tuan Yang di-Pertua,

1. Kerajaan amat prihatin dan mengambil perhatian yang sangat serius terhadap gelombang baharu COVID-19 yang sedang melanda negara yang telah memberi impak terhadap kelangsungan hidup rakyat secara keseluruhannya. Beberapa inisiatif telah dilaksanakan di bawah Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) bertujuan membantu rakyat yang terjejas atau kehilangan sumber pendapatan kesan dari pandemik COVID-19 tersebut. Antara inisiatif yang telah dilaksanakan untuk memberi kelegaan sementara atau “*temporary relief*” kepada rakyat bagi menampung kos keperluan harian, adalah dengan pemberian tunai secara *one-off* kepada golongan tersasar.

2. Selain bantuan segera berbentuk *one-off*, kerajaan turut mengurangkan tekanan beban kewangan isi rumah dengan bentuk bantuan lain seperti pemberian diskaun bil elektrik dan pengecualian bayaran sewa rumah membabitkan rumah PPR disewa atau transit bawah pengurusan Kementerian Perumahan dan Kerajaan Tempatan dan Dewan Bandaraya Kuala Lumpur. Selain itu, dalam usaha mengurangkan bilangan rakyat yang terjejas dan peningkatan pada jumlah pengangguran, Kerajaan telah mengumumkan Program Subsidi Upah (PSU) yang berupa bantuan kewangan untuk membantu majikan yang terkesan dari segi ekonomi akibat COVID-19 supaya dapat meneruskan operasi syarikat serta mengelakkan pekerja hilang pekerjaan dan punca pendapatan.

3. Berikutan pertambahan kes COVID-19 baru-baru ini, Kerajaan meneruskan momentum membantu rakyat dengan mengumumkan pakej Kerangka Inisiatif Tambahan Khas atau KITA PRIHATIN berjumlah RM10 bilion. KITA PRIHATIN merangkumi Bantuan Prihatin Nasional (BPN) 2.0 berjumlah RM7 bilion, Program Subsidi Upah 2.0 berjumlah RM2.4 bilion Geran Khas PRIHATIN 2.0 (GKP 2.0) sebanyak RM600 juta. Selain itu, **semasa pembentangan Belanjawan 2021 pada 6 November 2020 yang lalu, Kementerian Kewangan turut mengumumkan pelbagai**

inisiatif tambahan bagi membantu rakyat, golongan peniaga kecil dan PKS mikro serta sektor ekonomi.

4. Kerajaan turut membantu meringankan beban aliran tunai rakyat secara bersasar dan memudahkan moratorium kepada semua rakyat Malaysia yang terkesan tanpa mengira daripada golongan B40, M40 atau T20. Bagi golongan B40 dan peniaga kecil, mereka akan mendapat lanjutan moratorium bank secara automatik manakala golongan M40 pula hanya perlu membuat pengisytiharan sendiri (*self-declaration*) tanpa memerlukan dokumen. Bagi rakyat yang tidak tergolong dalam segmen-segmen di atas, mereka masih boleh mendapatkan moratorium dengan membuat permohonan kepada pihak bank masing-masing.

5. Kerajaan juga telah memutuskan program i-Sinar KWSP untuk membenarkan semua ahli yang terjejas dan terkesan akibat pandemik COVID-19 untuk membuat pengeluaran caruman di antara RM10,000 sehingga RM60,000 dari Akaun 1 tertakluk kepada terma dan syarat yang telah ditetapkan. Dengan adanya inisiatif-inisiatif ini, adalah diharapkan ia dapat membantu meringankan beban rakyat untuk terus meneruskan kelangsungan hidup dalam menghadapi gelombang ketiga COVID-19 ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 7 DISEMBER 2020 (ISNIN)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan apakah kedudukan negara setelah negara berdepan dengan penularan pandemik COVID-19 dari segi ekonomi, perniagaan yang digulung tikar, kehilangan pekerjaan, beban hutang yang ditanggung dan pendapatan negara selama tempoh PKP berjalan.

JAWAPAN

Tuan Yang di-Pertua,

1. Keluaran Dalam Negeri Kasar (KDNK) negara merekodkan penguncupan sebanyak 6.4 peratus bagi tempoh sembilan bulan pertama 2020. Namun, kegiatan ekonomi dijangka pulih secara beransur-ansur pada tempoh separuh kedua tahun 2020 di mana penguncupan KDNK pada suku ketiga telah berkurang kepada 2.7 peratus berbanding penguncupan 17.1 peratus pada suku tahun sebelumnya. Secara keseluruhannya, KDNK dijangka mencatat penguncupan sebanyak 4.5 peratus pada 2020 sebelum kembali pulih sekitar 6.5 hingga 7.5 peratus pada 2021.

2. Berdasarkan rekod Suruhanjaya Syarikat Malaysia (SSM) bagi tempoh Mac hingga Oktober 2020, bilangan penamatan atau penggulungan perniagaan adalah lebih rendah berbanding tempoh yang sama bagi tahun lepas. Sebagai contoh, bilangan penamatan perniagaan milikan tunggal dan perkongsian mencatatkan pengurangan sebanyak 25 peratus daripada 17,922 syarikat pada Mac hingga Oktober 2019 kepada 13,445 dalam tempoh yang sama tahun ini. Bilangan penggulungan juga telah menurun sebanyak 39 peratus daripada 1,251 syarikat kepada 762 dalam tempoh yang sama.

3. Kerajaan menerusi pakej rangsangan dan pemulihan ekonomi PRIHATIN, PRIHATIN PKS Tambahan, PENJANA dan KITA PRIHATIN telah melaksanakan beberapa inisiatif penstabilan pekerjaan seperti program-program subsidi upah dan pengekalan pekerjaan serta insentif pengambilan pekerja yang bertujuan untuk meminimumkan impak COVID-19 ke atas operasi pasaran buruh. Kesan positif langkah tersebut telah berjaya mengurangkan kadar pengangguran kepada 4.6 peratus atau 737,500 orang pada September 2020 daripada paras tertinggi 5.3 peratus atau 826,100 orang pada Mei 2020.

Tuan Yang di-Pertua,

4. Hutang Kerajaan Persekutuan telah meningkat kepada RM874.3 bilion atau 60.7 peratus daripada KDNK pada akhir-September 2020 berbanding RM823.8 bilion atau 57.2 peratus KDNK pada akhir-Mac 2020. Peningkatan hutang ini adalah setelah mengambil kira pinjaman kasar sebanyak RM108.2 bilion merangkumi pembiayaan semula kertas hutang yang matang berjumlah RM56.8 bilion dan pinjaman bersih sebanyak RM51.4 bilion digunakan bagi membiayai defisit yang turut meliputi perbelanjaan pakej rangsangan dan pelan pemulihan ekonomi dalam tempoh April hingga September 2020. Namun, hutang statutori Kerajaan berada pada tahap 57.7 peratus kepada KDNK pada September 2020, iaitu kurang dari siling 60 peratus kepada KDNK yang ditetapkan.

5. Unjuran jumlah hasil Kerajaan Persekutuan bagi 2020 telah disemak kepada RM227.3 bilion berbanding anggaran asal RM244.5 bilion berikutan unjuran KDNK yang lebih rendah dan kejatuhan harga minyak mentah dunia. Kerajaan akan menampung kekurangan pendapatan berkenaan melalui sumber hasil *one-off* daripada dividen dan bayaran khas oleh syarikat Kerajaan, meneroka hasil cukai baharu, penjimatan subsidi minyak dan penstrukturan serta pengagihan semula perbelanjaan Kerajaan Persekutuan. Selain itu, Kerajaan turut memperuntuk pertambahan perbelanjaan bagi melaksanakan pakej rangsangan dan pemulihan ekonomi susulan penularan pandemik COVID-19. Sehubungan itu, defisit fiskal pada tahun 2020 dijangka meningkat kepada 6 peratus berbanding sasaran awal 3.2 peratus daripada KDNK.

Sekian, terima kasih.